

文類聚 別集 百十七、百十八

六	一	二	六	換書門
一	一	五	二	
三	一	二	六	
一	〇	一	二	類

六	一	二	六
一	一	五	二
三	一	二	六
一	〇	一	二

内 閣 文 庫			
番 號	漢	6126	
冊 數	61 ( 60 )		
函 號	365	31	



事文類聚別集

廿五之六

十五

東京圖書館			
三〇册	卷一	別加函	漢書門類書類

不許帶出



新編古今事文類聚卷之二十五

別集

建安祝穆和父編

人事部

# 行旅

羣書要語

旅瑣瑣注瑣細小也最處下極寄

旅不得所安而為厮賤之役所取

致灾旅卦旅即次懷其資得僮僕貞同上旅而

無所容故受之以巽巽者入也注旅而無所容

以巽則得所入也序卦載脂載牽還車言邁泉

水星言夙駕定之方中今者闕然數日不見車

馬有行色莊盜跣適百里者宿春適千里者三

月聚糧莊子跋履山川踰越險阻左成十二征

夫勞于周行楚詞僕夫悲予懷兮馬蜷局而不

行楚詞日既西頽車殆馬煩洛神賦裹足入秦

李斯書已業行婁敬傳蒙霜露沐風雨淮南王

傳賜祿秩以辨裝龔勝傳擲風沐雨多在道路

文選行旅不齎糧唐太宗紀繭足千里劉禹錫

膏吾車兮秣吾馬韓文行李之李字人姓之外

更無別義左傳行李之往來杜不究意理注云

行李使人也今遠行結束次第謂之行李而不

悟是行使耳按舊文使字作岑傳寫誤作李資

暇集

**詩句**誰能久京洛緇塵染素衣謝元暉夜聞漢

使歸獨向刀頭泣從軍行馬是賒來貴童因倩

得頑姚合慈母手中線游子身上衣孟平生未

到處落日獨行時張喬長為萬里客有愧百年

身杜旋呵鞭手凍枯鬚羅鄴朝遊九城陌肥馬

香車欺殺客幕宿五侯門殘茶冷酒愁殺人李

古今事實

迷途莫問

黃帝將見大隗乎具茨之山方明為御昌寓驂  
乘張若謂朋前馬昆閻滑稽後車至於襄城之  
野七聖皆迷無所問途疏大隗至人也莊子

異鄉見似人

子不聞夫越之流人乎去國數日見其所知而  
喜去國旬月見所嘗見於國中者而喜及期年  
也見似人而喜矣不亦去人滋久思人滋深乎  
夫逃虛空者藜藿柱乎鼪鼯之徑踉位其空聞  
人足音蹙然而喜矣而况乎有昆弟親戚馨歎

其側者乎莊子

百舍重趼

士成綺見老子百舍重趼胠而不敢息莊天道

就國夜行

師尚父就國道宿行遲逆旅之人曰吾聞時難  
得而易失客寢處安殆非就封者也太公聞之  
夜衣而行至國萊侯來伐與之爭營丘史記

躡蹻擔簦

虞卿躡蹻擔簦說趙王注簦笠有柄者

思歸不忘

漢書韓王信報柴將軍曰僕之思歸如痿人不  
忘起盲者不忘視勢不可耳

微行被辱

漢武帝嘗至柏谷夜投亭宿亭長不內乃宿於  
逆旅逆旅翁謂上曰汝長大多力當勤稼穡何  
忽帶劍羣聚夜行動衆此不欲爲盜則淫耳上  
默然不應因乞漿飲翁曰吾止有溺無漿也有  
頃還內上使人覘之見翁方要少年十餘人皆  
持弓矢刀劍令主人媼出安過客媼歸謂其翁  
曰吾觀此丈夫乃非常人也且亦有備不可圖

也不如因禮之其夫曰此易與耳鳴鼓會衆討  
此羣盜何憂不尅媼曰且安之令其眠乃可圖  
也翁從之時上從者十餘人旣聞其謀皆懼勸  
上夜去上曰去必致禍不如且止以安之有頃  
媼出謂上曰諸公子不聞主人翁言乎此翁好  
飲酒狂悖不足計也今日具令公子安眠無他  
媼因還內時天寒媼酌酒多與其夫諸少年皆  
醉媼出謝客殺雞作食平明上去是日還宮乃  
召逆旅夫妻見之賜媼金十斤其夫爲羽林郎  
自是懲戒希復微行

漢武故事

隨牒遠方

康衡曰但以無階朝廷故隨牒在遠方注謂隨  
補選之常牒不被超擢也

萍浮南北

鄭康成萍浮南北黃巾爲害復歸邦鄉

宿處輒掃

郭林宗每行宿逆旅輒躬洒掃及明去後人至  
見之曰此必郭有道昨宿處也

夜宿古冢

陸雲嘗行逗宿故人家夜暗迷路莫知所從忽

望見草中有火光於是趣之至一家便寄宿見  
一少年美風姿共談老子辭致深遠向曉辭去  
行十里至故人家云此數里中無人居却尋昨  
宿處乃王弼冢雲本無玄學自此談老殊進本傳

途窮而哭

阮籍率意獨駕不由徑路車跡所窮輒慟哭而  
返

富恠贖錢

平陵士孫奮富聞京師性儉恠嘗宿客舍顧錢  
直甚少主人曰君惜錢如此欲作士孫景卿耶



新豐逆旅

馬周留客汴爲俊儀令崔賢所辱遂感激而西  
舍新豐逆旅主人不之顧周命酒一斗八升悠  
然獨酌衆異之

古今文集

雜著

子長遊贈蓋邦式序 馬子才

予友蓋邦式嘗爲予言司馬子長之文章有奇  
偉氣竊有志於斯文也子其爲說以贈我予謂

子長之文章不在書學者每以書求之則終身  
不知其奇予有史記一部在天下名山大川壯  
麗可怪之處將與子周遊而歷覽之庶幾可以  
知此文矣子長生平喜遊方少年自負之時足  
跡不肯一日休非直爲景物役也將以盡天下  
大觀以助吾氣然後吐而爲書觀之則其平生  
所嘗遊者皆在焉南浮長淮泝大江見狂瀾驚  
波陰風怒號逆走而橫擊故其文奔放而浩漫  
望雲夢洞庭之陂彭蠡之瀦混太虛呼吸萬壑  
而不見介量故其文停滯而淵深見九疑之芊

蘇巫山之差我陽臺朝雲蒼梧暮煙態度無定  
靡曼綽約春粧如濃秋飾如薄故其文妍媚而  
蔚紆泛沅渡湘弔大夫之蒐悼妃子之恨竹上  
猶有班班而不知魚腹之骨尚無恙者乎故其  
文感憤而傷激比過大梁之墟觀楚漢之戰場  
想見項羽之喑鳴高帝之慢罵龍跳虎躍千兵  
萬馬大弓長戟俱遊而齊呼故其文雄勇猛健  
使人心悸而膽慄世家龍門念神禹之大功西  
使巴蜀跨劍閣之鳥道上有摩雲之崖不見斧  
鑿之痕故其文斬絕峻拔而不可攀躋講業齊

魯之都覩夫子之遺風鄉射鄒嶧彷徨乎汶陽  
洙泗之上故其文典重溫雅有似乎正人君子  
之容貌凡天地之間萬物之變可驚可愕可以  
娛心使人憂使人悲者子長盡取而爲文章是  
以變化出沒如萬象供四時而無窮今於其書  
而觀之豈不信矣予謂欲學子長之爲文先學  
其遊可也不知學遊以采竒而欲操筆弄墨紐  
綴腐熟者乃其常常耳昔公孫氏善舞劍而學  
書者得之乃入於神庖丁氏善操刀而養生者  
得之乃極其妙事固有殊類而相感者其意同

故也今天下之絕縱詭觀何以異於昔子果能  
爲我遊者乎吾欲觀子矣醉把盃酒可以吞江  
南吳越之清風拂劍長嘯可以吸燕趙秦隴之  
勁氣然後歸而治文著書子畏子長乎子長畏  
子乎不然斷編敗冊朝吟而暮誦之吾不知所  
得矣

古詩

途中

白居易

早起上肩擗一盃平旦醉晚憇下肩擗一覺殘  
春睡身不經營物心不思量事但恐綺與紈只

如吾氣味

長安秋夕

戎昱

八月更漏長愁人起常早閉門寂無事滿地生  
秋草昨宵西窻夢先入荆南道遠客歸去來在  
家貧亦好

早行

孔文仲

客興謂已旦出視見落月瘦馬入荒陂霜花重  
如雪海風吹萬里兩耳凍幾脫歲晏已苦寒近  
北尤凜冽况當清曉行遡此原野闊笠飛帶繞  
頭指強不得結農家煙火微炙手粗可熱豈能

迂我留而就苟且活仰頭視四字夜氣亦漸豁  
苦心待正晝白日想不缺

遠遊篇

十九歲作

朱元晦

舉坐且停酒聽我歌遠遊遠遊何所至咫尺視  
九州九州何茫茫環海以爲疆上有孤鳳翔下  
有神駒驤孰能不憚遠爲我遊其方爲子奉尊  
酒擊鉢歌慨慷送子臨大路寒日爲無光悲風  
來遠壑執手空徊徨問子何所之行矣戒關梁  
世路百險艱出門始憂傷東征憂暘谷西遊畏  
羊腸南轅犯癘毒北駕風裂裳願子馳堅車躡  
險摧其剛我我旣不支瑣瑣誰能當朝登南極  
道莫宿臨太行睥睨即萬里超忽凌八荒無爲  
弊躩者終日守空堂

行路難

張籍

湘東行人長歎息十年離家歸未得弊裘羸馬  
苦難行僮僕盡飢少筋力君不見牀頭黃金盡  
壯士無顏色龍蟠泥中未有雲不能生彼昇天  
翼

義和謠

楊廷秀

中秋夜宿辟邪市詰朝早起曉星

已上日欲出而月未落光景萬變  
蓋天下奇觀也作羲和謠以紀之  
羲和夢破欲啓行紫金畢逋啼一聲聲從天上  
落人世千村萬落雞爭鳴素娥西征未歸去  
弄銀盤浣風露一丸玉彈東飛來打落桂林雪  
毛兔誰將紅錦幕半天赤光絳氣貫山川須臾  
却駕丹砂轂推上寒空輾蒼玉詩翁已行十里  
強羲和早起道無雙

律詩

河陽道中

李洞

衝風仍躡凍提轡手頻呵翻憶江濤裏船中睡  
蓋簑

途中早發

劉禹錫

中庭望啓明促促事晨征寒樹鳥初動霜橋人  
未行水流白煙起日上綵霞生隱士應高枕無  
人問姓名

商山早行

溫庭筠

晨起動征鐸客行悲故鄉雞聲茅店月人跡板  
橋霜槲葉落山路枳花明驛牆因思杜陵夢鳧  
鴈滿迴塘

秋江晚泊

杜荀鶴

一望一蒼然蕭騷起暮天  
遠山橫落日歸鳥度  
平川家是去年別月當  
今夜圓漁翁似相伴  
徹曉葦叢邊

早行

賈島

早起赴前程鄰雞尚未鳴  
主人燈下別羸馬  
月中行踏石新霜滑  
穿林宿鳥驚遠山鍾動後  
曙色漸分明

早行

許渾

失枕驚先起人家半夢中  
聞雞憑早晏占斗認

西東轡濕知行露衣單  
覺曉風秋陽弄光影忽  
吐半林紅

絕句

李義山

君問歸期未有期巴山夜雨漲秋池  
何當共剪西窗燭却話巴山夜雨時

渡桑乾

賈島

客舍中州三十霜歸心日夜憶咸陽  
無端更渡桑乾水却望并州是故鄉

醉後

劉商

春草秋風老此身一瓢長醉任家貧  
醒來還愛

浮萍草漂寄官河不屬人

秋霖夜憶家

韓偓

垂老何時見弟兄背燈愁泣到天明不知短髮能多少一滴秋霖白一莖

尤溪道中

韓偓

水自潺湲日自斜盡無雞犬有鳴鴉千村萬落如寒食不見人煙空見花

早發

羅隱

北去南來無定居此生計竟何如酷憐一覺平明睡長被雞聲惡破除

看花

羅鄴

花開只恐看來遲及到愁如未看時家在楚鄉身在蜀一年春色負歸期

行次

前人

終日長程復短程一山行盡一山青路傍君子莫相笑天上由來有客星

題驛舍

盧秉

青衫白髮病將軍旋糴黃糧買酒樽但得有錢留客醉也勝騎馬傍人門

宿濟州西門外旅館 晁端友

寒林殘日欲棲烏  
壁裏青燈乍有無  
小雨惜惜人假寐  
卧聽疲馬啣殘芻

秋雨

張復之

簾幙瀟瀟竹院深  
客懷孤寂伴燈吟  
無端一夜空階雨  
滴破思鄉萬里心

次韻王稚川客舍

黃魯直

五更歸夢嘗苦短  
一寸客愁無柰多  
慈母每占烏鵲喜  
家人應賦戾戾歌

王稚川既得官都下有所盼未歸予

戲作林夫人

稚川妻

歎乃歌二章與

之

黃魯直

花上盈盈人不歸  
棗下纂纂實已垂  
臘雪在時聽馬嘶  
長安城中花片飛  
從師學道魚千里  
蓋世功名黍一炊  
日日倚門人不見  
看盡林烏反哺兒

春夕旅懷

崔塗

水流花謝兩無情  
送盡東風過楚城  
蝴蝶夢中家萬里  
杜鵑枝上月三更  
故園書動經年絕  
華髮春惟兩鬢生  
自是不歸歸便得  
五湖煙景有誰爭



倦客

鄭谷

十年五年岐路中  
千里萬里西復東  
疋馬愁衝晚村雪  
孤舟悶阻春江風  
達士由來知道在  
昔賢何必笑途窮  
閑烹蘆笋炊菰米  
會向漁鄉作醉翁

舟行即事

杜荀鶴

年少髭鬚雪欲侵  
別家三日幾般心  
朝隨賈客憂風色  
夜逐漁翁宿葦林  
秋水鷺飛紅蓼晚  
暮山猿叫白雲深  
重陽酒熟茱萸紫  
却向江頭倚棹吟

秋日旅中

杜荀鶴

浮宦浮名能幾何  
致身流落向天涯  
少年心壯輕為客  
一日病來思在家  
經雨凍蟬隨葉墮  
過湖秋鴈趁雲斜  
前程雖有投人處  
爭柰鄉關日漸賒

容州賃居寄蕭郎中

周朴英華

古店茅軒向水開  
東頭舍賃一徘徊  
窻吟苦為秋江靜  
枕夢驚因曉角催  
隣舍見愁賒酒與  
主人知去索錢來  
眼看白筆為霖雨  
肯使紅鱗便曝腮

# 別離

## 羣書要語

遵大路兮摻執子之手兮詩歌驪

駒其辭云驪駒在門僕夫具存驪

駒在路僕夫驚駕逸詩悲莫悲兮生別離楚辭

撩慄兮若遠行登山臨水兮送將歸同上間何

闊諸葛豐傳

**詩句** 嬌兒不離膝畏我却復去杜契闊阻風期

荏苒成雨別独孤及索居動經秋載笑知曷月

同上漸消酒色朱顏淺欲語離情翠黛低張藉

## 古今事實

### 孔子贈言

子路將行辭於孔子孔子曰贈以帛乎贈汝以

言乎對曰請以言孔子曰不強不達不勞無功

不忠無親不信無復不恭無禮謹此五者而已

矣子路曰願終身奉之家語

### 老子贈言

孔子去周而老子送之曰吾聞富貴送人以金

仁者送人以言吾雖不能富貴而竊仁者之號

請送子以言凡當世之聰明深察而近於死者

好議人者也傳辨宏大而危其身者好發人之  
惡者也孔子曰敬奉教也

家語

### 晏子贈言

曾子行晏子從於郊曰嬰聞之君子贈人以言  
庶人贈人以財請假於君子贈吾子以言

荀大略

### 離羣索居

子貢曰吾離羣而索居亦已久矣

禮

### 乃若婦人

子高遊趙平原君客有鄒文李節者與相友善  
及將還魯諸故人訣既畢文節送行三宿臨別

文節流涕交頤子高徒握手而已分背就路其  
徒問先生與彼二子善彼有戀戀之心而先生  
厲聲高揖無乃非親之謂乎高曰始吾謂此二  
子丈夫耳今乃知其婦人人生有四方之志豈  
鹿豕哉而常羣聚乎

孔叢子

### 贈以不拜

陳遵使匈奴過辭於王丹丹謂遵曰俱遭世反  
覆唯我二人為天地所遺今子當之絕域無以  
相贈贈子以不拜遂揖而別遵甚喜

東觀漢記

### 不見黃生

後漢黃憲字叔度同郡陳藩周舉相謂曰時月之間不見黃生則鄙吝之萌復存乎心。唐賀知章陸象先曰季真清談風流吾一日不見則鄙吝生矣

士別三日

呂蒙曰士別三日則刮目相待吳志

覩物思人

王猛將行造慕容垂飲酒從容謂垂曰今當遠別何以贈我使我覩物思人晉海西公下

相別作惡

謝安嘗謂王羲之曰中年傷於哀樂與親友別輒作數日惡羲之曰年在桑榆自然至此常恐兒輩覺損其歡樂之趣王羲之傳

夜宿誰家

宋選送弟入洛登舟挂席東下選疑佇久之語細君曰帆過南浦今夜清風明月宿水渚誰家

古今文集

雜著

別賦

江文通

黯然銷魂者唯別而已矣况秦吳兮絕國復燕

宋兮千里或春苔兮始生乍秋風兮暫起是以  
行子腸斷百感悽惻風蕭蕭而異響雲漫漫而  
奇色舟凝滯於水濱車逶迤於山側擢容與而  
詎前馬寒鳴而不息掩金觴而誰御橫玉柱而  
霑軾居人愁卧恍若有亡日下壁而沉彩月上  
軒而飛光見紅蘭之受露望青楸之離霜巡層  
楹而生掩撫錦幙而虛涼知離夢之躑躅意別  
魂之飛揚故別離一緒事乃萬族至若龍馬銀  
鞍朱軒繡軸悵飲東都送客金谷琴羽張兮簫  
鼓陳燕趙歌兮傷美人珠與玉兮豔暮秋羅與

綺兮嬌上春驚駟馬之仰秣登淵魚之赤鱗迨  
分手而銜涕感寂寞而傷神乃有劍客慙恩少  
年報士韓國趙廁吳宮燕市割慈忍愛離邦去  
里瀝泣共訣拔血相視驅征馬而不顧見行塵  
之時起方街感於一劍非買價於泉裏金石震  
而色變骨肉悲而心死或乃邊郡未和負羽從  
軍遼水無極鴈山參雲閨中風暖陌上草薰日  
出天而耀景露下地而騰文鏡朱塵之照爛襲  
青氣之烟煜攀桃李兮不忍別送愛子兮霑羅  
裙至如一去絕國詎相見期視喬木兮故里訣

北梁兮永辭左右兮寃動親賓兮淚滋可班荆  
兮贈恨惟樽酒兮叙悲值秋鴈兮飛日當白露  
兮下時怨復怨兮遠山曲去復去兮長河湄又  
若君居淄右妾家河陽同瓊珮之晨照共金爐  
之夕香君結綬兮千里惜瑤草之徒芳慙幽閨  
之琴瑟晦高臺之流黃春宮闕此青苔色秋帳  
含茲明月光夏簟清兮晝不暮冬釭疑兮夜何  
長織錦曲兮泣已盡迴文詩兮影獨傷儻有華  
陰上士服食還山術既妙而猶學道已寂而未  
傳守丹竈而不顧鍊金鼎而方堅駕鶴上漢驂  
鸞騰天蹇游萬里少別千年惟世間兮重別謝  
主人兮依然下有芍藥之詩佳人之歌桑中衛  
女上官陳娥春草碧色春水綠波送君南浦傷  
如之何至乃秋露如珠秋月如珪明月白露光  
陰往來與子之別思心徘徊是以別方不定別  
理千名有別必怨有怨必盈使人意奪神駭心  
折骨驚雖淵雲之墨妙皆嚴樂之筆精金閨之  
諸彥蘭臺之羣英賦有凌雲之稱辯有雕龍之  
聲詎能摹暫離之狀寫永訣之情者乎

古詩

古樂府

行行重行行與君生別離相去萬餘里各在天  
一涯道路阻且長會面安可知胡馬依北風越  
鳥巢南枝相去日已遠衣帶日已緩浮雲蔽白  
日遊子不顧反思君令人老歲月忽已晚棄捐  
勿復道努力加餐飯

明月何皎皎照我羅牀帷憂愁不能寐攬衣起  
徘徊客行雖云樂不如早旋歸

涉江採芙蓉蘭澤多芳草採之欲遺誰所思在  
遠道還顧望舊鄉長路漫浩浩同心而離居憂  
傷以終老

庭中有奇樹綠葉發華滋攀條折其榮將以遺  
所思馨香盈懷袖路遠莫致之此物何足貴但  
感別經時

贈蘇武別

李陵

良時不再至離別在須臾屏營衢路側執手野  
踟躕仰視浮雲馳奄忽互相踰風波一失所各  
在天一隅長當從此別且復立斯須欲因晨風  
發送子以賤軀

同前

李陵

攜手上河梁遊子暮何之徘徊蹊路側恨恨不  
得辭行人難久留各言長相思安知非日月弦  
望自有時努力崇明德皓首以爲期

別李陵

蘇武

雙鳧俱北飛一鳧獨在翔子當留斯館我當歸  
故鄉一別如秦胡會見何詎央愴恨切中懷不  
覺淚沾裳願子長努力言笑莫相忘

同前

蘇武

征夫懷往路起視夜何其參辰皆已沒去去從  
此辭行役在戰場相見未有期握手一長歎淚  
爲生別滋努力愛春華莫忘歡樂時生當復來  
歸死當長相思

別離

陸龜蒙

丈夫非無淚不洒離別間仗劍對樽酒恥爲游  
子顏蝮蛇一螫手壯士疾解腕所思在功名離  
別何足歎

古別離

趙微明

爲別未幾日一日如三秋猶疑望可見日日上  
高樓唯見分手處白蘋滿芳洲寸心寧死別不  
忍生離憂



贈崔純亮別

孟郊

食齋腸亦苦強歌聲無歡出門即有礙誰謂天地寬有礙非遐方長安大道旁小人智慮險平地生太行鏡破不改光蘭死不改香始知君子交久之道益彰君心與我懷離別俱迴遑譬如浸蘖泉流苦日已長忍泣目易衰忍悲形自傷項籍豈非壯賈生豈非良當其失意時涕泗各滿裳古人勸加餐此餐難自強一飲九祝噎一嗟十斷腸况是兒女冤冤氣凌彼蒼彼蒼若有知白日下清霜今朝始驚呼碧落空茫茫

怨別

孟郊

一別一回老志士髮白早在富易爲容居貧難自好沉憂損性靈服藥亦枯槁秋風客子衣落日行遠道君問去何之賤身寧自保

汴州留別韓愈

孟郊

不飲濁水瀾空滯此汴河坐見遶岸水盡爲還海波四時不在家弊服斷線多遠客獨顛顛春英各婆娑荒陂饒曲流野桑無直柯但爲君子心歎息終匪他

長安留別李觀韓愈因獻張徐州

富別愁在顏貧別痛銷骨懶磨舊銅鏡畏見新  
白髮古樹春無花子規啼有血離弦不堪聽一  
聽三四裂世途非一險俗慮有千結有客步大  
方驅車獨迷轍故人韓與李逸翰雙皎潔哀我  
摧折歸贈詞縱橫設徐方國東樞元戎天下傑  
襴生投刺遊王粲吟詩謁高情無遺照朗抱開  
曉月有土不埋冤有讎皆爲雪願爲直草木永  
向君地列願爲古琴瑟永向君聽發欲識丈夫  
心曾將寶刀說

孟郊

生別難

白居易

食藥不易食梅難藥能苦兮梅能酸未如生別  
之爲難苦在心兮酸在肝晨雞載鳴殘月沒征  
馬重嘶行人出迴看骨肉哭一聲梅酸藥苦甘  
如蜜黃河水白黃雲秋行人河邊相對愁天寒  
野曠何處宿棠梨葉戰風颼颼生別離憂從中  
來無斷絕憂積心勞血氣衰未年三十生白髮

別三子

陳無已

夫婦死同穴父子貧賤離天下寧有此昔聞今  
見之母前三子後熟視不得追嗟爾胡不仁使

我至於斯有女初束髮已知生離悲枕我不肯  
起畏我從此辭大兒學語言拜揖未勝衣喚爺  
我欲去此語那可思小兒襁褓間抱負有母慈  
汝哭猶在耳我懷人得知

有所思

盧仝

當時我醉美人家美人顏色嬌如花今日美人  
棄我去青樓珠箔天之涯娟娟常娥月三五二  
八盈又缺翠眉蟬鬢生別離一望一見心斷絕  
心斷絕幾千里夢中醉卧巫山雲覺來淚滴湘  
江水兩岸花木深美人不見愁人心含愁更奏  
綠綺琴調高絃絕無知音美人兮美人不知爲  
暮雨兮爲朝雲相思一夜梅花發忽到窻前疑  
是君

醉留東野

韓愈

昔年因讀李白杜甫詩長恨二人不相從吾與  
東野生並世如何復躡二子蹤東野不得官白  
首跨龍鍾韓子稍姦黠自慙青蒿倚長松低頭  
拜東野願得終始如駟螭東野不迴頭有如寸  
莛撞鉅鍾吾願身爲雲東野變爲龍四方上下  
逐東野雖有別離無由逢

律詩

不見

杜甫

不見李生久，佯狂真可哀。世人皆欲殺，吾意獨  
憐才。敏捷詩千首，飄零酒一盃。匡山讀書處，頭  
白好歸來。

夜與故人別

于武陵

白日去難駐，故人非舊容。今宵一別後，何處更  
相逢。過楚水，千里到秦山。萬重話來天未曉，月  
落滿城鍾。

寄南遊弟兄

竇鞏

書來未報幾時還，知在三湖五嶺間。獨立衡門  
秋水闊，寒鴉飛去日街山。

淮上與友人別

鄭谷

揚子江頭楊柳春，楊花愁殺渡江人。數聲風笛  
離亭晚，君向瀟湘我向秦。

陽關三疊 見饒送門

絕句

孫冕 或云唐鄭賢

亭亭畫舸繫寒潭，直到行人酒半酣。不管煙波  
與風雨，載將離恨過江南。

元相公賓府有薛書記飲酒醉後因

爭令擲注子擊傷相公猶子遂出幕  
醒來乃作十離詩上獻或云蜀妓薛  
濤爲連帥所怒作此以獻

馴擾朱門四五年毛香足淨主人憐無端咬着  
親情客不得紅絲毯上眠

右犬離主

越管宣毫始稱情紅牋紙上撒花瓊都緣用久  
鋒頭盡不得羲之手裏擎

右筆離手

雪耳紅毛淺碧蹄追風曾到日東西爲驚玉貌  
郎君墜不得華軒更一嘶

右馬離廐

隴西獨自一孤身飛去飛來上錦茵都緣出去

無方便不得籠中再喚人

右鸚鵡離籠

出入朱門未忍拋主人嘗愛語咬咬銜泥穢汚  
珊瑚簾不得梁間更壘巢

右燕離巢

皎潔圓明內外通清光似照水精宮都緣一點  
瑕相穢不得終宵在掌中

右珠離掌

戲躍蓮池四五秋常搖朱尾弄輪鈎無端擺斷  
芙蓉朶不得清波更一遊

右魚離池

爪利如鋒眼似鈴平原捉兔稱高情無端竄向  
青雲外不得君王手上擎

右鷹離主

翦鬱新栽四五行常將貞節負秋霜爲緣春筍

鑽墻破不得垂陰覆玉堂

右竹離亭

鑄瀉黃金鏡始開初生三五月徘徊為遭無限  
塵蒙蔽不得華堂上玉臺

右鏡離臺

詩話

詠曹顏遠詩

殷浩甥韓伯隨至徙所經歲還都浩送至渚側  
詠曹顏遠詩云富貴他人合貧賤親戚離因而  
泣下

醉中分袂

蕭鳳使玉門關弟蕭勸酒頻頻謂兄曰醉中庶

分袂不悲杜送王判官黔陽信使應稀少莫恠  
頻頻勸酒盃

奪胎換骨

東坡長短句云無情汴水自東流只載一船離  
恨向西州張文潛詩云亭亭畫舸繫春潭只待  
行人酒半酣不管煙波與風雨載將離恨過江  
南王平甫愛而誦之不知其出於外此奪胎換  
骨法也

泊宅編

還歸

詳見思鄉門

羣書要語

薄言還歸采繁言還言歸黃鳥式

遄其歸烝民還鄉者心務見家不

可以一步至也劉子已出反舍叔孫通傳出有

賜曰餞路反有勞曰輓脚揚國忠傳

**詩句** 俶裝反柴荆陶新歸且慰意生理焉足說

杜北征 錦城雖云樂不如早還家李白近家心

轉切不敢問來人獨孤遐樂莫樂於還故鄉坡

踏着家鄉馬脚輕王建

古今事實

來歸自鎬

薄伐獫狁至于太原文武吉甫萬邦為憲吉甫

燕喜既多受祉來歸自鎬我行永久

衮衣公歸

東山周公東征也九戩周大夫刺朝廷之不知

也是以有衮衣兮無以我公歸兮

馬生角

燕太子丹為質於秦秦不禮乃求歸秦曰待烏

白頭馬生角當放子歸太子仰天哭感得烏頭

白馬角生秦王大驚乃遣丹歸遊歷紀聞

杖節歸漢見羊門

彭澤賦歸見米門

角巾還第

有往來者言庾公有東下意或謂王公可潛稍嚴以備不虞王公曰我與元規雖俱王臣本懷布衣之好若其欲來吾角巾徑還烏衣何所稍嚴

角巾歸里

羊祜與從弟琇曰既定邊事當角巾東路歸故里為容棺之墟以白士而居重位何能不以盛滿受責乎本傳

千載來歸

遼東城門華表柱忽有一白鶴少年欲射之乃飛徘徊言曰有鳥有鳥丁令威去家千載今來歸城郭是人民非何不學仙家累累搜神記

置軟脚局

郭子儀自同州歸詔大臣就宅作軟脚局人率三百千大唐

古今文集

雜著

歸去來辭

陶潛



歸去來兮田園將蕪胡不歸旣自以心爲形役  
奚惆悵而獨悲悟已往之不諫知來者之可追  
實迷途其未遠覺今是而昨非舟搖搖以輕颺  
風飄飄而吹衣問征夫以前路恨晨光之熹微  
乃瞻衡宇載欣載奔僮僕歡迎稚子候門三逕  
就荒松菊猶存携幼入室有酒盈樽引壺觴以  
自酌盼庭柯以怡顏倚南窗以寄傲審容膝之  
易安園日涉以成趣門雖設而常關策扶老以  
流憩時矯首而遐觀雲無心以出岫鳥倦飛而  
知還景翳翳以將入撫孤松而盤桓

歸去來兮請息交以絕游世與我而相遺復駕  
言兮焉求悅親戚之情話樂琴書以消憂農人  
告余以春及將有事乎西疇或命中車或掉孤  
舟旣窈窕以尋壑亦崎嶇而經丘木欣欣以向  
榮泉涓涓而始流善萬物之得時感吾生之行  
休已矣乎寓形宇內復幾時曷不委心任去留  
胡爲乎皇皇欲何之富貴非吾願帝鄉不可期  
懷良辰以孤往或植杖而耘耔登東臯以舒嘯  
臨清流而賦詩聊乘化以歸盡樂夫天命復奚  
疑

古詩

休假還舊業便使 王維

謝病始告歸依依入桑梓家人相佇立相俟衡  
門裏時輩今長年成人舊童子上堂嘉慶畢顧  
與姻親齒論舊忽餘悲自存且相喜田園轉蕪  
沒但有寒泉水衰柳日蕭條秋光清邑里入門  
乍如客歸騎非便止中飲顧王程離憂從此始

示三子

陳無已

去遠即相忘歸近不可忍兒女已在眼眉目略  
不省喜極不得語淚盡方一哂了知不是夢忽

忽心未穩

還里

陳無已

曠士愛吾廬遊子悲故鄉慷慨四方志老衰但  
悲傷虛名自成誤失得略相當莫年還家樂未  
覺道路長間里喜我來車馬塞康莊爭前借言  
色草木亦晶光向來千人聚一老獨徜徉手開  
南陽阡松栢鬱蒼蒼永願守一丘脫身萬里航  
平生功名念倒海浣我腸尚恐北山南有文移

路傍

律詩

秋晚歸故居

李昌符

馬首曾行處連嘶渡晚河忽驚鄉樹出漸識路  
人多細徑穿禾黍頽園壓薜蘿乍歸猶似客鄰  
叟亦相過

送孟六歸襄陽

王維

杜門不欲出久與世情疎以此爲長策勸君歸  
舊廬醉歌田舍酒笑讀古人書好是一生事無  
勞獻子虛

還鄉偶書

黃拱

離別家鄉歲月多歸來人事半消磨惟有門前

鑑湖水春風不減舊時波

少小離家老大回鄉音難改鬢毛鬢兒童相見  
不相識却問客從何處來

歸計

沈存中

住山人少說山多空只年年憶薜蘿不是自心  
應不信眼前歸計又蹉跎

歸洛言懷

司馬君實

三十餘年西復東勞生薄宦等飛蓬所存舊業  
唯清白不負明時有朴忠早避喧煩真得策未  
逢危辱好收功太平觸處農桑滿贏取問閭鶴

髮翁

合并

羣書要語

勿疑朋盍簪注勿疑則朋合疾也

豫卦邂逅相遇野有蔓草脫然若

沉痾之去體灑然若執熱之濯清風也

韓文

**詩句** 江湖十年別衰老一樽同劉長卿桃李春

風一盃酒江湖夜雨十年燈山谷江山千里俱

頭白骨肉十年終眼青山谷

古今事類

傾蓋而語

孔子之郊遇程子於塗傾蓋而語終日甚相親

家語

班荆而食

楚伍舉將奔晉聲子遇之於鄭郊班荆相與食

而言注布荆坐地左襄二十六

刮目相待

魯肅過呂蒙言議常欲受屈拊蒙背曰吾謂大

弟但有武略今者學識英博非復吳下阿蒙蒙

曰士別三日即更刮目相待

相別一世

張乖崖少與逸人傅霖同學公既顯達求霖三十年不可得作憶霖詩云寄語巢由莫相笑此生終不羨輕肥晚年守宛丘有被褐騎驢叩門大呼曰語尚書青州傅霖閹吏走白公曰傅先生天下士汝何人敢呼姓名霖笑曰別子一世尚爾童心是豈知世間有我哉公問昔何隱今何出霖曰子將亡矣來報子公曰詠亦自知之霖曰知復何言後一月公薨

古今文集

雜著

聚星亭畫屏贊并序 朱元晦

按世說陳太丘詣荀朗陵貧儉無僕役乃使元方將車季方持杖從後長文尚少載着車中既至荀使叔慈應門慈明行酒餘六龍下食文若亦小坐着膝前于時太史奏真人東行考亭陳氏故有離榭名以聚星蓋取續陽秋語中更廢壞近始作新適邇敞廬因得相其役

事既又爲之本原事迹畫着屏上  
并爲之贊以視來者云

猗歟陳子神嶽鍾英文淵範懿道廣心平危孫  
污隆卷舒自我是曰庶幾無不可獻身安衆  
弔豎全邦炯然方寸秋月寒江願言懷人曰我  
同志故朗陵君荀季和氏連峯對起麗澤潛滋  
儂而不見有黯其思薄言造之顧無僕役獨呼  
二兒駕予以出青芻黃犢布幘柴車策紀前衛  
杖謔後趨所造維何高陽之里維時荀君聞至  
而喜顧謂汝靖往應于門七龍矯矯布席開尊

靖肅而前翁拜其辱何悟斯晨得見清穆命爽  
行觴旅饋次陳獻酬交錯禮度情親載笑載言  
罔非德義益邁乃猷以輔斯世髡髻兩稚亦置  
膝前源深本固莫出匪賢維此慈明特謝儔匹  
晚際國屯敢憚濡迹贅旒之命恃以少延邦明  
之最孰與爲先郁乃附曹羣亦忘漢嗣守之難  
古今共歎崇臺回極于以占天猶曰茲野德星  
萃焉我寓有亭舊蒙斯號今刺前聞象儀以告  
高山景行好德所同課忠責孝獨槩余衷百爾  
窺臨鏡考母怠死國承家永奉明戒

古詩

○贈衛八處士

杜甫

人生不相見動如參與商今夕復何夕共此燈  
 燭光少壯能幾時鬢髮各已蒼訪舊半為鬼驚  
 呼熱中腸焉知二十載重上君子堂昔別君未  
 婚兒女忽成行怡然敬父執問我來何方問荅  
 未及已兒女羅酒漿夜雨剪春韭新炊間黃梁  
 主稱會面難一舉累十觴十觴亦不醉感子故  
 意長明日隔山岳世事兩茫茫

贈史修文

沈千運

故人阻千里會面非別期握手於此地當歡返  
 成悲念離宛猶昨俄已經於暮疇昔皆少年別  
 來髮如絲不過舊姓名相逢知是誰曩遊盡騫  
 翥與君仍布衣豈曰無其才命理應有時別路  
 漸欲少不覺生涕洟

元稹為御史奉使東川於褒城贈黃

明府詩其序云昔年曾於解縣飲酒

余為觥錄事嘗於寶明府廳有一人

至頻犯語令連飛十數觥不勝因逃

去醒後問人前虞卿黃丞也此後絕

不復知元和四年三月奉使東川十  
六日至褒城驛逡巡有黃明府見迎  
瞻其形容髣髴似識問其前銜即曩  
日逃席黃丞也說向前事黃生惘然  
而悟因饋酒一罇艤舟請余同載余  
不欲孤其意與之盡歡徧問褒陽山  
水則褒姒所奔褒城在其左諸葛所  
征之路次其右感今懷古作贈黃明

府詩曰

昔年曾痛飲黃令因飛觥席上當時走馬前今  
日迎依稀迷姓字積漸識平生故友身皆遠他  
鄉眼暫明便邀連榻坐兼共刺船行酒思涼風  
亂霜積拂地平不看深淺酌貪愴古今情迤邐  
七盤路坡陀數大城花疑褒女笑棧息武侯征  
一種埋幽石空聞千載名



新編古今事文類聚卷之二十五

別集

新編古今事文類聚卷之二十六

別集

建安祝穆和父編

人事部

書問

羣書要語

簡牒也 說文簡書編也 釋名簡謂之畢爾雅續書版也 說文札櫛也

編之如櫛齒相比也 釋名斷木為槧論衡槧版

長三尺即牘牒也 釋名子寧不嗣音詩子衿母

金玉爾音而有遐心 白駒小夫之知不難苞苴

書問

新編古今事文類聚卷之二十五

別集

竿牘敵精神乎蹇淺莊子千里之情通管子言

心聲書心畫也聲畫形君子小人見矣揚子面

相之辭相適捺中心之所欲通諸人之嘖嘖憤

憤也者莫如言彌綸天下之事記久明遠著古

昔之昏昏目所不見傳千里之恣恣心所不可

者莫如書揚子時有奏記朱博傳移書顯責之

薛宣傳心開目明反覆數周曠然發矇蔡邕傳

執玩反覆不能釋手劉廙傳萬里之心存於尺

書劉琨傳闕然久不報幸勿為過馬遷傳公府

奏記郡將奏牋文心雕龍蔡邕曰相見無期唯

是書疏可以當面本傳書疏往返未足解其勞

結魏文帝答吳質書信到奉所惠貺發函伸紙

是何文采之巨麗而慰喻之綢繆乎吳質答曹

植書因江潭而注記兮欽弔楚之湘纍揚雄反

騷承問震惶精爽飛越劉越石書申詠反覆曠

若復面文選讀之喜笑把玩無厭同上東望於

邑裁書敘心文選尺牘書疏千里面目顏氏家

訓坐馳之際翰驛復來段成式書抽黃對白吟

弄飛走駢四儷六錦心繡口柳宗元乞巧文黃

鵠一去青冥無極安得不憑豐隆翹飛廉以寄

聲於寥廓耶柳宗元山人序言之微妙書不能

文也心之精微口不能言也張敞封事陳遵占

辭旨意各具彌衡代書親踈得宜文心雕龍蒼

鴈頰鯉時流尺素清風朗月俱寄相思周弘讓

答王褒書欲致一書問足下并自舒其所懷含

意連辭將發復已卒不能成就其說退之答侯

**詩句**愧無雜佩贈良訊代兼金陸機誰謂情可

盡盡書非尺牘謝遠今朝聽聲喜家信必應歸

梁蕭紀詠鵲開緘書札光杜甫有弟皆羈旅無

家問死生寄書多不達况乃未休兵杜秦中相

思千萬里一書直千金李烽火連三月家書抵

萬金杜拆書八九讀淚落千萬行元稹忽因西

飛禽贈我以瓊琚韋應物行數雖不多字字有

委曲同上去憑遊客寄來為問家書杜甫書來

細作行杜詩欲問平生無使來杜甫征人去日

殷勤囑歸鴈來時早寄書樂府不枉故人書無

由泛江水韓親朋無一字杜寄書惟在頻無恠

簡與繒韓袖中有短書願寄雙飛燕江淹厚祿

故人書斷絕北書不至鴈無情杜紫燕西飛欲

寄書願况此信的應中路見亂山何處拆書看

杜牧之道州手札適復至紙長要自三過讀杜  
開緘宛見諫議面盧仝謝孟諫議茶母付書至  
妻寄衣開緘發封淚痕稀韓

古今事實

書藏記室

成王有病周公旦自揃其爪以沉於河曰云云  
乃書而藏之記室蒙恬傳

寓書

子產寓書於子西以告宣子左襄二十四  
書付其子

趙簡子少子老無恤簡二自為書牘使誦之居  
三年簡子坐青臺之上問書所在無恤出其書  
於左袂令誦習焉韓詩外傳

刀筆吏

蕭何曹參起秦刀筆吏注刀所以削書古者用  
簡牘故吏皆以刀筆隨本贊

奉咫尺書

廣武君謂韓信曰君若使一介奉咫尺之書史記  
中涓

萬石君為中涓受書謁本傳

嫚書之辱

漢匈奴冒頓高后時遺書曰孤僨之君生於沮澤之中長於平野牛馬之域數至邊境願遊中國陛下獨立孤僨獨居兩主不樂無以自娛願以所有易其所無高后報書曰單于不樂弊邑賜之以書弊邑恐懼退日自圖年老氣衰齒髮墮落行步失度單于過聽不足以自污弊邑無罪宜在見赦

鴈足繫書

蘇武留匈奴十九年昭帝與匈奴和親求武等詭言武死後漢使至常惠夜見教言天子射上林中得鴈足有繫帛書言武等在某澤中使者如惠語讓單于單于驚謝曰武等實在武等始以疆壯出及還鬚髮盡白

買菜求益

後漢嚴光傳注侯霸使西曹侯子道奉報書求報光曰我手不能書乃口授之使者嫌少可更足之光曰買菜乎求益乎

藏去爲榮

陳遵性善書與人尺牘主皆藏去以爲榮請求

不敢逆所到衣冠懷之本傳

憑几口占

陳遵為河南太守嘗遣從吏西召善書吏於前治私書謝京師親故憑几口占書數百封親踈各有意

問訊

趙廣漢為京兆尹嘗記召湖都亭長西至界上界上亭長戲曰為我多問趙君亭長至廣漢謂曰界上亭長寄聲謝我何以不為致問亭長叩頭服實有之趙君者言殷勤若今人千

萬問訊也

手跡

後漢馬融與竇伯向書曰孟陵奴來賜書見手跡歡喜

青泥封

鄧訓故吏知訓好青泥封書從黎陽步推鹿車載青泥至上谷遺訓東漢記

妻不寄書

後漢王良東海人為司空司直妻子不入官舍布被瓦器司徒史鮑恢到東海過候良家妻布

裙曳柴從田中歸恢曰我司徒人也故來受書  
妻曰妾是也苦椽無書恢歎息去

折簡可呼

王凌面縛水次遙謂司馬宣王曰卿直以折簡  
召我我何敢不至而乃引君來乎宣王曰以卿  
非折簡可呼故也 魏略

通權貴書

漢陳咸滯於郡守時王音輔政信用陳湯咸數  
賂遺湯予書曰即蒙子公 湯字 力得入帝城死  
不恨 本傳

拜跪讀父書

吳顧愷以孝悌廉正聞於鄉黨每得父書洒掃  
整衣服設几案舒書其上拜跪讀之每句應諾  
畢復再拜

口授

蜀王平爲鎮北大將軍生長戎旅手不能書所  
識不過十字而口授作書皆有意理使人讀史  
備知大義

不作草書

席豫與子弟屬吏書不作草字 三國劉廙曰尊

早有分不敢修草書

黃耳傳書 見狗門

自沉自浮

殷羨為豫章太守都下人士因其致書百餘函行次石頭皆投之水中曰沉者自沉浮者自浮殷洪喬不為置書郵 浩傳

賢十部從事

劉弘每有興發手書守相丁寧款密所以人皆感悅爭赴之咸曰得劉公一紙書賢於十部從

事晉懷紀

竟達空函

桓溫將以殷浩為尚書令遺書告之浩欣然許焉答書慮有謬誤開閉者十數竟達空函大忤溫意由是遂絕 殷浩致書於簡文具目申叙

帳下兒讀

劉荊州嘗自作書欲與孫伯符以示禰正平正平嗤之曰如是之作欲使孫郎帳下兒讀之耶將使張子布見乎 典略

輕重得體

禰衡為江夏太守黃祖作書記輕重踈密各得



體宜祖持其手曰處士皆正得祖意如祖腹中之欲言也

不喜作書

嵇康作絕交書曰不喜作書而人間多事堆案盈几不相訓答則犯教傷義欲自勉則不能久

小紙勿報

何曾好學博聞武帝拜為太尉性奢侈人以小紙為書勅記室勿報

莫不手答

陶侃為荊州遠近書疏莫不手答

音詞流暢

徐湛之善於尺牘音詞流暢沈約宋書

善效人書

魏鍾會與鄧艾平蜀艾先入成都會善效人書艾章表白事皆易其言令悖傲矜伐又毀文王報書手作以疑之

用小却字

晉人帖中往往用小却字其意猶言少退也南史宋武帝紀帝疾召太子戒之曰謝誨數從征伐頗識機變若有同異必此人也小却可以會

稽汀州處之

答書不廢應對

南史劉穆之與朱齡石於齊武帝坐並答書自旦至日中穆之得百函齡石得八十函而穆之應對不廢

隨機報答

後周中書監盧柔太祖引為行臺即對掌機密時汝穎之間多舉義來附書翰往返日餘百牒柔隨機報答皆合事宜

五雲體

唐韋陟常以五采牋為書記使侍妾主之其牋答受意而已皆有楷法陟唯署名自謂所書陟字若五朶雲時人慕之號郇公五雲體

始為疊幅

盧光啓受知於租庸張濬每致書凡一事別為一紙朝士效之蓋重疊別紙自光啓

號柳篋子

柳璨遷左拾遺公卿朝野託為箋奏時譽以其博洽目為柳篋子

千里對面

房元齡傳高祖曰若人機識實宜委任每為吾兒陳事千里外猶對面語

書唯稱郡

李楨常以爵位不如施望官至刺史與人書唯

稱隴西李楨李肇國史補

壻不輒開

劉宴任權潘炎乃其壻雖書疏報答未嘗輒開時稱有古人節

繫書鴿足

張九齡家養羣鴿每與親知書繫鴿足上飛往

投之目為飛奴王仁裕開元遺事

焚書不辯

錢徽為禮部段文昌李紳以書託徽徽不從二人怒奏徽取士以私坐貶江州或勸出文昌紳私書自直徽曰苟無愧於心安事辯證勅子弟焚書

求書先容

顧雲大順中同羊昭業等修史時劉子長僕射有清名求高逢休諫議書為先容雲潛啓閱之凡一幅並不言雲但云昭業等擬將一尺三寸

汗脚踏他龍尾道雲歎息而已撫言

無名

王鐔節度淮南嘗得無名書納鞞中俄取他書焚之異日因小罪并以所告窮驗示衆以爲神明

半夜傳緘

杜牧之作李賀集序云大和五年十月中半夜時舍外有疾呼傳緘者某曰必有異亟取火來及發之果集賢學士院沈公書一道曰吾亡友李賀且死以其文求序

家書抵萬金

王筠久在沙場一日偶得家書曰抵得萬金耳懶不附書

李翱答獨孤舍人書所不數附書者性頗慵懶便一切畫斷祇作報書

漢上題衿

段成式與溫庭筠等唱和往來書目之爲漢上題衿大抵多閨闈中情昵事

投之苦海

鄭光業有一巨皮箱凡投贄有可嗤者即投其

中號曰苦海撫言

無書被薦

司馬光薦劉安世充館職謂安世曰光居間足下問訊不絕光居政府足下獨無書此光之所以相薦也

商人通書

丁崖州多智數在海外有一販夫輒與數百緡任其貨易歲久不問商人疑其意且欲報之曰相公或使之雖死不避丁乃預計南京春宴必有中使在坐因作表丐還封爲書投府坐約商人曰汝必於是日到仍須宴次投之商人欣躍而去至則如其言府坐得書懼不敢發欲匿之又中使已見遂因中使回附奏自是得移光州其表云雖遷陵之罪大念立王之功多

談圃

發其私書

王荆公薦呂惠卿爲參知政事惠卿既得位遂叛荆公出荆公平日私書有曰無使齊年知齊年謂馮公京蓋荆公與馮公皆辛酉生又曰無使上知神宗始不悅荆公矣

聞見錄

安書不讀

侍講胡安定公瑗布衣時與孫明復石守道同  
讀書泰山攻苦食淡終夜不寢一坐十年不歸  
得家問見上有平安二字即投之澗中不復展  
讀

無日不觀

張文潛每見親友書無月日便擲於地更不復  
觀

避人家諱

本朝滎陽呂公希哲嘗言凡與交遊書聞其父  
祖知名於世者須避其名諱凡作書須先思及  
書之於几然後作書文潞公與故舊款接一坐  
未嘗犯其父祖名諱

雜志

焚書息禍

方諫議謹言為侍御史時丁謂貶遣謹言籍其  
家得士大夫書房干請關通者悉焚之不以聞  
世稱其長者

厚德錄

古今文集

雜著

古帖多弔喪

閣下諸帖十卷淳化中朝廷所集其中多弔喪

問疾人多疑之比見刊誤乃唐國子祭酒李注所撰短啓出於晉宋兵革之間時國禁書疏非弔喪問疾不得輒行尺牘故王羲之首云死罪違制令故也且啓事論兵皆短而緘貴易於隱藏雜志

### 古禮猶簡

昔人最重契舊朋從年長則以兄事之齒少或以弟或以友呼焉父之交遊敬之爲丈見之必拜執子姪之禮甚恭丈人行者命與其諸郎遊子又有孫者崇輩行略不紊亂如分守之嚴舊例書札只云啓或稍尊則云再拜雖行高而位崇者不過曰頓首再拜而已非父兄不施覆字宰輔以上方曰台候餘不敢也前輩名公尺牘中可考今俱不然誠可太息

揮麈錄

### 書簡循習

近代士人相承於書尺語言浸涉竒猥雖有賢識不能自改如小簡問委自言所在必求新異之名予守贛時屬縣興國宰詒書云湫水有驅策乞䟽下湫水者彼邑一水耳郡中未嘗知此不足以爲竒當言下邑屬邑足矣爲縣丞者無

不采藍田壁記語云負丞某處哦松無補沾筆  
承乏皆厭爛陳言至稱丞曰藍田殊為可笑初  
赴州郡與人書必曰前政頽靡倉庫匱乏未知  
所以善後必習一律正使真如所陳讀者亦不  
之信予到當塗日謝執政書云郡雖小而事簡  
庫錢倉粟自可支吾得坐嘯道院誠為至幸周  
益公答云從前得外郡太守書未嘗不以窘冗  
為詞獨創見來緘如此蓋覺其與他異也此兩  
者皆狃熟成俗故紀述以戒子弟輩

容齋隨筆

書簡題目

作文字紀月日當以實言若拘拘然必以節序  
則為牽強乃似麻沙書坊桃源居士輩所跋耳  
至於往還書問不可不繫日而性率者一切不  
書予有壻生子遣報云今日巳時得一子更不  
知為何時或又失之好奇外姻孫鼎臣每致書  
必題其後曰某節至云小暑前一日驚蟄前兩  
日之類文惠公常笑云看孫鼎臣書須着置曆  
日於案上蓋自元正人日上巳端午七夕重九  
除夕外雖寒食冬至亦當謹識之况於小小氣  
候後生宜戒

容齋隨筆



畏人索報書

士大夫得交朋書問有懶傲不肯即答者記白  
樂天老慵一絕句曰豈是交親向我踈老慵自  
愛閉門居近來漸喜知聞斷免惱嵇康索報書  
案嵇康與山濤絕交書云素不便書又不喜作  
書而人間多事堆案盈几不相酬答則犯教傷  
義欲自勉強則不能久樂天所云正此也乃知  
畏於答書其來久矣 容齋隨筆

古詩

飲馬長城窟行

青青河畔草綿綿思遠道遠道不可思夙昔夢  
見之夢見在我傍忽覺在他鄉他鄉各異縣展  
轉不相見枯桑知天風海水知天寒入門各自  
媚誰肯相爲言客從遠方來遺我雙鯉魚呼童  
烹鯉魚中有尺素書長跪讀素書書中竟何如  
上有加餐食下有長相憶

古樂府

孟冬寒氣至北風何慘慄愁多知夜長仰觀衆  
星列三五明月滿四五蟾兔缺客從遠方來遺  
我一書札上言長相思下言久離別置書懷袖

中三歲字不滅一心抱區區懼君不識察

訓崔十五見招 李白

爾有烏拆書相招琴溪飲手把尺素書如天落  
雲錦讀罷向空笑疑君在我前長吟字不滅懷  
袖且三年

以詩代書答元丹丘 李白

青鳥海上來今朝發何處口啣雲錦書與我忽  
飛去鳥去凌紫煙書留綺窻前開緘方一笑乃  
是故人傳故人深相勗憶我勞心曲離居在咸  
陽三見秦草綠置書雙袂間引領不暫閑長望  
杳難見浮雲橫遠山

寄皇甫湜 韓愈

敲門驚晝睡問報睦州吏手把一封書上有皇  
甫字拆書放床頭涕與淚垂泗昏昏還就枕惘  
惘夢相值悲哉無竒術安得生兩翅

暮秋枉裴道州手札率爾遣興

杜甫

久客多枉友朋書素書一月凡一束虛名但蒙  
寒暄問泛愛不救溝壑辱齒落未是無心人舌  
存恥作窮途哭道州手札適復至紙長要自三

過讀盈把那須滄海珠入懷本倚崑山玉

答邊信

長孫佐

征人去年戍遼水夜得邊書字盈紙揮刀就燭  
裁紅綺結作同心答千里君寄邊書書莫絕妾  
答同心心自結同心再解心不離書字頻看字  
愁滅結成一夜和淚封貯書只在懷袖中莫如  
書字固難久願學同心長可同

律詩

寄高詹事

杜甫

安穩高詹事兵戈久索居時來知官達歲晚莫  
情踈天上多鴻鴈河間足鯉魚相看過半月不  
寄一行書

夜中得循州趙司馬侍郎書因寄迴

使

盧綸

瘴海寄雙魚中宵達我居兩行燈下淚一紙嶺  
南書地說炎蒸極人稱老病餘殷勤報賈傅莫  
共酒杯踈

送楊禁侍兼寄山谷 陳無已

多問黃居士終年欠一書因人問消息有使報  
何如

寄張大夫

陳無已

一別今何向三年訊不通不應書字倦未有北來鴻

逢入京使

岑參

故園東望路漫漫雙袖龍鍾淚不乾馬上相逢無紙筆憑君傳語報平安

投簡梓州幕府兼簡韋郎官門

見同僚

送蕭二十二赴歙州婚期

盧仝

淮上客情殊冷落蠻方春早客何如相思莫道無來使回鴈峯前好寄書

寄元明

黃魯直

但知家裏人無恙不用書來細作行一百八盤携手上至今猶夢繞羊腸

寄叔父夷仲

黃魯直

關寒塞雪欲寄音燕鴈拂天河鯉沉百書不如一見面幾日歸來兩慰心

詩話

求書得詩

蔣堂侍郎告老姑蘇有僧將遊錢塘求呂濟叔

書公作詩乃云告老於君惟掩戶年來無事老  
江干吾師莫訝無書去閑慢緘題不必看  
青瑣  
高議

十年無書

章子厚與劉子先嘗有場屋之舊又頗相善子  
厚居京口子先守姑蘇以新醞洞庭春寄之子  
厚答詩曰洞霄宮裏一閑人東府西樞舊老臣  
多謝姑蘇賢太守殷勤分送洞庭春其後契闊  
十年子厚拜相亦不通問寄書誚其相忘遠引  
之意子先以詩謝曰故人天上有書來責我踈  
愚喚不迴兩處共瞻千里月十年不寄一枝  
梅塵泥自與雲霄隔駕馬難追德驥才莫謂  
無心向門下也曾終夕望三台公得詩大喜  
即召爲宰屬遂遷戶部侍郎

投贄

暗投

羣書要語

凡贄天子鬯諸侯圭卿羔大夫  
鴈士雉庶人之摯匹  
音鷺童子  
委摯而退野外軍中無摯以纓拾矢可也婦  
人之摯棋棊脯脩棗栗  
曲禮士相見之禮贄

冬用雉夏用牯儀禮暗投明月之珠夜光之

璧以闇投人於道無不按劍相盼何則無故

而至前也又曰彼非所明而投之注是猶對

牛鼓簧耳又曰大聲不入於俚耳注非委巷

之所尚也又曰折楊黃華則嗑然而笑注俗

人得嘖曲則同聲動笑也莊齊物篇雖濬發

於巧心終見嗤於拙目史通

詩句此路無知己明珠莫暗投高適白雲非

衆聽夜光忌暗投山谷

古今事實

執贄還贄

周公謂伯禽之傅曰我文王之為子武王之為

弟成王之為叔父吾於天下不賤矣然而吾所

執贄而見者十人還贄而見者三十人貌執之

士百有餘人欲言而請畢事者千有餘人於是

吾僅得三士焉以正吾身以定天下荀堯問

以鼠為璞

昔鄭人以乾鼠為璞鬻之於周宋愚夫亦寶燕

石緹襲十重出聞子夫覩之者掩口胡盧而笑

尹文子曰鄭人謂玉琢者為璞周人謂鼠未腊

事類彙編卷之三

七

者為璞周人遇鄭賈人曰欲買璞乎鄭賈曰欲之出璞示之乃鼠也因謝不取晏類要

好竽鼓瑟附

齊王好竽有求仕於齊者操瑟而往立王之門三年不得入叱曰吾瑟鼓之而能使鬼神上下為鼓瑟合軒轅氏之律呂客罵之曰王好竽而子鼓瑟瑟雖工如王不好何是所謂工於瑟不工於求齊也韓文

以玉為石見玉門

問柏板名

韓愈皇甫湜一代龍門牛僧孺携所業謁之其首篇說樂即捲卷問曰且以柏板為什麼僧孺曰樂句二公大稱賞由此名振撫言

古今文集

雜著

上任德翁序十五歲作

唐子西

薛郡任公之教授通義也士之曳長裾服方領抱書束帶優游於泮宮者數百人英俊豪傑往往輩出有少年書生曰唐某者誦書不甚多屬

事類彙編卷之三

三

文不甚工碌碌落落無可稱者一日持一軸書  
掉三寸舌草衣麻屨攘袂登門危言高論不顧  
忌諱公一見而嗟異之再見而禮貌之三見而  
憐恤之勸戒勤篤教諭欵密某處之而不能自  
安退而諮之於客曰公於我厚矣吾將圖報矣  
吾欲脅肩諂笑巧言令色以順適其意以是報  
公可乎客曰不可是小人之報也吾將抱長劍  
挾匕首有惡聲至者以血濺其襟以是報公可  
乎客曰是俠客之報也吾將淬文鋒礪詞鐔庶  
幾起騰奮躍高飛遠舉於天下使天下之人指  
之曰斯人也出於任公之門以是報之可乎客  
曰唯唯是國士之報也某因書以爲序

古詩

琉璃瓶歌贈晁二 張文潛

火維荒茫地軸傾下有積水潛鯤鯨鼇身翻瀾  
山爲崩金烏下啄獐龍騰狂鬚竒鬣萬族朋巨  
神日月雙手擎夸娥愁思烏戢翎老魚戮死風  
雨腥長彗下掃千里驚淺洲一席塊烏城蠻兒  
夷女竒弁纓大舶映天日百程怒帆吼風戰飛  
鵬舟中之人恠眉睛獸肌鳥舌髻翹撐萬金明



珠絡如繩白衣夜明非縞繒以有易無百貨傾  
室中開橐光出楹非石非玉色紺青昆吾寶鐵  
雕春冰表裏洞徹中虛明宛然而深是爲瓶補  
陀真人一鉢衣攀藤燕坐花雨飛兜羅寶手親  
挈携楊枝取露救渴飢海師跪請顙有胝番禺  
寶市無光輝流傳人間入吾手包以百襲吳綿  
厚擇人而歸今子授爛然光輝子文章清明無  
垢君肺腸比君之德君勿忘與君同升白玉堂  
九江千歲龜歌贈無咎

張文潛

靈龜千年口不食以背負牀飲其息吾家兩龜  
豈徒不食亦不息壽與萬古無終極濟南晁君  
博物天地通夜窺斗牛頗似晉司空指我兩龜  
有名字大龜爲九江小龜號千歲老龍洞庭怒  
蕩覆堯九州二咄嗟水平流九江無波拍天浮  
中有大靈背如丘南風吹楚澤蓮葉青欲秀有  
物中作巢一寸玄介胄霞衣仙人鬢如霜飲以  
南極之光芒丹顙老客一作瘦容不相見飛渡  
東海巢一作朝扶桑邇來蟠桃枝有子大如缶  
浮遊輕於鳥一作我身輕若蓬江海一回首青

珊瑚柱碧瑤宮水仙焚香吹作風朝戲蓮葉西  
暮遊蓮花東秋風蓮子熟歸去清江國小千歲  
大九江我久不見之向君案前雙我謂晁君二  
物有似我與子國有守龜吾子是燦然天下之  
寶器黃金之騰紫瑤匱天王端冕史再拜一逆  
一從定大事我身百無用頗似千歲潛深淵不  
願人間貯金籍三萬富貴但願寄身江上一葉  
之秋蓮萬物才不才用舍不在天寄聲問晁君  
然不然

贈二蘇公

陳無已

岷峨之山中巴江桂椒栴櫨楓柞樟青金黃玉  
丹砂良獸皮鳥羽不足當異人間出駭四方嚴  
王陳李司馬楊一翁二季對相望竒寶橫道驥  
服箱誰其識者有歐陽大科異等固其常小却  
盛之白玉堂典謨雅頌用所長度越周漢登虞  
唐千載之下有素王平陳鄭毛視荒荒後生不  
作諸老亡文體變化未可量萬口一律如吃羌  
妖狐幻人犬陸梁虎豹却走逢牛羊上帝惠顧  
被不祥天門夜下龍虎章前驅吳回後炎皇絳  
旗丹轂朱冠裳從以甲冑萬鬼行乘風縱燎無

留藏天高地下日月光授公以柄扶病傷士如  
稻田待公秧臨流不度公爲航如大醫王治膏  
育外證已解中尚強探囊一試黃芪湯一洗十  
年新學腸老生塞口不敢嘗向來狂殺今尚狂  
請公別試囊中方

古風二首上蘇子瞻

一首見梅門一首見松門

律詩

上知府寇相公

魏野

文武稟全才何人更可陪有官居鼎鼎無地起  
樓臺聖主詩方和親王狀始回鎮臨求二陝調  
燮輟三台鳳閣須重去龍旌暫擁來下車三度  
雨上事數聲雷未暇瞻珪璧先蒙訪草萊幾思  
趨相府恐懼復徘徊

謁張安國

王廷秀

帝苑花濃記並遊萬人回首看黿頭也知旬月  
應顙面已逼雲霄又作州別後聞公非故我學  
林着脚到前修登門猶說同年話未覺紅鸞映  
白鷗

詩話

投梅花賦

劉禹錫上權舍人書曰昔宋廣平之沉下僚也蘇公味道時為繡衣直指使者廣平投以梅花賦蘇盛稱之自是乃列於文人之首

投贄不開

樂天不為贄皇公所喜每寄詩文李絳之一篋未嘗開 詩話

先慢後敬

樂天未冠以文謁顧况况覩姓名熟視曰長安米貴居大不易乃披卷讀其芳草詩野火燒不盡春風吹又生歎曰吾謂斯文遂絕今復得子矣前言戲之耳

塗竄贄文

牛僧孺赴舉之秋嘗投贄於劉補闕禹錫對客展卷飛筆塗竄其文歷二十餘歲劉轉汝州牛出鎮漢南枉道汝州駐旌信宿酒酣賦詩劉方悟往年改公文卷僧孺詩曰粉署為郎四十春今來名輩更無人休論世上昇沉事且闔樽前見在身珠玉會應成咳唾山川猶覺露精神莫嫌恃酒輕言語曾把文章謁後塵禹錫和云昔

年曾忝漢朝臣晚歲空餘老病身初見相如成  
賦日後為丞相掃門人追思往事咨嗟久  
清光笑語頻猶有當時舊冠劍待公三日拂埃  
塵牛公吟和詩前意稍解曰三日之事何敢當  
焉宰相三朝後主印可以昇降百司也於是移  
宴竟夕方整前驅也劉乃戒其子咸久承雍曰  
吾成人之志豈料為非汝輩進修守中為上古  
今詩話

### 梅詩見知

王沂公曾為布衣時以所業贄呂文穆蒙正中  
有早梅詩其警句云雪中未論和羹事且向百  
花頭上開文穆云此生次第已安排作狀元了  
做宰相矣已而果然

湘山野錄

### 慶賀

#### 羣書要語

大厦成而燕雀相賀淮南子慶者在堂弔者在閭禍與福鄰莫知其

門荀子其非惟我賀將天下實賀昭八

詩句問里自相賀韓還鄉問井邑上堂多慶喜

歐歸來見親戚握手相弔慶歐飢貧相乘除未

見可弔賀坡

古今事實

慶弔相隨

蘇秦說齊王再拜仰而賀俯而弔齊王曰是何慶弔之相隨也

賀錢萬

單父人呂公善沛公避仇從之因家焉沛中豪吏聞令有重客皆往賀蕭何爲主吏主進令諸大夫曰進不滿千錢坐之堂下高祖爲亭長素易諸吏給曰賀錢萬實不持一錢謁入呂公大

驚起迎之門

不賀而弔

高祖使使拜蕭何爲相國益封爲相國衛諸君皆賀故秦東陵侯召平獨弔謂何曰以淮陰新反有疑君心夫置衛衛君非以寵君願讓封勿受悉以家財佐軍何從其計上悅

殺敵不受賀

後漢劉表爲荊州牧時驃騎將軍張濟自關中奔南陽因攻襄城中飛矢而卒官屬皆賀表曰濟以窮來主人無禮至於交鋒此非牧意牧受

弔不受賀也使人納其衆衆聞之喜遂皆服從

諸君何賀

荀勗自中書監遷尚書令甚愠有賀者勗怒曰奪我鳳凰池諸君何賀耶

賀錢一千

呂僧珍生子朱季雅往賀署函曰錢一千闔人少之不爲通強之乃進

梁書

遷官不受賀

唐岑文本初拜中書令有憂色母問之答曰非勲非舊責重位高所以憂也有來賀者輒曰今日受弔不受賀

門無賀客

向敏中文簡除右僕射麻下日李昌武爲翰林學士當對

真宗謂曰朕自即位以來未嘗

除僕射今日以命敏中門下賀客必多卿往觀之明日却對來勿言朕意也昌武侯丞相歸乃往見丞相方謝客門闌悄然無一人昌武與向親徑入賀之公但唯唯卒無一言旣退復使人至庖厨中問今日有無宴會亦寂無一人明日具以所見對上笑曰向敏中大耐官職

筆談

官尊止賀

王文正公晚年官重每家人出賀立令止之因語其弟曰遭遇如此愈增憂懼何可賀也公每有賜予見家人置於庭下乃瞑目而歎曰生民膏血安用許多名臣遺事

古今文集

雜著

誠子孫

柳玘

董生有云弔者在門賀者在閭言有憂則恐懼敬事敬事則必有善功而福至也又曰賀者在門弔者在閭言受福則驕奢驕奢則禍至故弔隨而來齊項公之始藉霸者之餘威輕侮諸侯虧政蹇之容故被安革之禍遁服而亡所謂賀者在門弔者在閭也兵敗師破人皆弔之恐懼自新百姓愛之諸侯皆歸其所奪邑所謂弔者在門賀者在閭

對賀者

柳宗元

柳子以罪貶永州有自京師來者既見曰余聞子坐事斥逐余適將唁子今余視子之貌浩浩然也能是達矣余無以唁敢更以為賀柳子曰




子誠以貌乎則可也然吾豈若是而無志者耶  
姑以戚戚爲無益乎道故若是而已矣吾之罪  
大會主上以寬理人用和天下故吾得在此凡  
吾之貶斥幸矣而又戚戚焉何哉夫爲天子尚  
書郎謀畫無所陳而羣比以爲名蒙恥遇僂以  
待不測之誅苟人爾有不汗栗危厲惵惵然者  
哉吾嘗靜處以思獨行以求自以上不得自列  
於聖朝下無以奉宗祀近丘墓徒欲苟生存  
庶幾似續之不廢是以儻蕩其心倡佯其形茫  
乎若升高以望潰乎若乘海而無所往故其容  
貌如是子誠以浩浩而賀我其孰承之乎嘻笑  
之怒甚乎裂眦長歌之哀過乎慟哭庸詎知吾  
之浩浩非戚戚之尤者乎子休矣

賀下不賀上


賀下不賀上此天下通語士人歷官一任得外  
無官謗中無所愧於心釋肩而去如大熱遠行  
雖未到家得清涼館舍一解衣漱濯已足樂矣  
况於致仕而歸脫冠佩訪林泉顧平生一無可  
恨者其樂豈可勝言哉余出入文忠公門最久  
知其欲釋位歸田可謂切矣他人或苟以藉口

公發於至情如飢者之念食也顧勢有未可者  
耳觀與仲儀書論可退之節三至欲以得罪而  
去君子之欲退其難如此可以為好進者之戒  
志林



新編古今事文類聚卷之二十六

別集



事文類聚別集

廿七之八

十六

東 京 圖 書 館			
三	卷	別	類
册	號	函	書
			門

不許帶出

新編古今事文類聚卷之二十七

列集

建安祝穆和父編

人事部

謁見 先容

簡傲

羣書要語

古者未有紙削竹木以書姓名故謂之刺後以紙書故謂之名紙唐李德裕貴盛人務加禮改具銜候起居之狀故謂之門狀續世說消人如謁者消潔玉潔除之人也陳勝傳注既見君子我心則降詩願望履

幙下莊子侍於下風幸聞咳唾之音莊子伺候  
於公卿之門奔走於形勢之途足將進而趑趄  
口將言而囁嚅韓送李愿序君出我入若相避  
然韓文野渡斷橋非寇平仲訪魏野之便中路  
破居非宰周公會許男之所揚誠齋與周益公  
書先容明月之珠夜光之璧以暗投人於道莫  
不按劍相賤者何則無因而至前也蟠木根抵  
輪困離竒而為萬乘器者以左右為之先容也  
鄒陽書

詩句有客叩我門繫馬門前柳杜君來不遇我

我去不逢君唐詩肯訪浣花老翁無與奴白飯  
馬青藜杜公卿朱門未開鎖我曹已到肩相隨  
杜玉川先生洛城裏杜門不出動一紀勸參留  
守謁大尹言語纔及輒掩耳韓侯門見說深如  
海三十年來掉臂行邵康節

古今事實

握髮吐哺

伯禽就封於魯周公戒之曰我文王之子武王  
之弟成王之叔父我於天下亦不賤矣然我一  
沐三握髮一飯三吐哺起以待士猶恐失天下

之賢人爾之魯戒無以國驕人世家

闕亡往拜

陽貨闕孔子之亡而饋孔子蒸豚孔子亦闕其  
亡而往拜之

來謁無益

穰侯謂王稽謁君得無與諸侯客子俱來乎無  
益徒亂人國耳

難見如鬼

蘇秦曰楚國之食貴於玉薪貴於桂謁者難見  
如鬼戰國王難得見如天帝今令臣食玉炊桂

因鬼見帝 戰國策

乃肯臨臣

漢韓信為淮陰侯居常鞅鞅羞與絳灌等列嘗  
過樊將軍噲噲趨拜送迎曰大王乃肯臨臣信  
出門笑曰生乃與噲等伍

幸肯臨况

田蚡傳將軍乃幸肯臨况魏其詳見飲酒門

掃門求見

漢書魏勃欲求見齊相曹參家貧無以自通常  
獨早掃齊相舍人門外舍人恠之以為物而伺

之得勃勃曰願見相君無因故爲子掃欲以求見於是舍人見勃勃曹參因以爲舍人

百騎造門

爵祿不相責以禮同類之遊不以遠近爲故東方先生居蓬戶空穴之中魏公子以百騎造之大丈夫相知何必接塵而遊垂髮齊年哉東方朔與公孫洪書

內謁徑入

前翟方進內謁徑入注猶今之通名也

迺幸左顧

淮南憲王傳子高迺幸左顧注猶言枉顧

間闕

前諸葛豐傳間何闕逢諸葛

躡履出迎

暴勝之爲直指使者聞雋不疑賢至勃海遣吏請與相見不疑冠進賢冠帶櫛具劔佩環玦褒衣博帶盛服至門上謁門下欲使解劔不疑曰劔者武備不可解吏白勝之開閤延請衣冠甚偉勝之躡履而迎

曳裾王門



鄒陽曰今臣盡智畢議竭精極慮則無國不可  
奸飾固陋之心則何王之門不可曳長裾乎

不避寒暑

張湯造請諸公不避寒暑

侯謁值雨

漢樓護家居長安時成都侯商爲大司馬衛將  
軍輔政罷朝欲侯護主簿諫將軍至尊不宜入  
閭巷商不聽遂至護家家狹小官屬立車下久  
住移時天欲雨主簿謂西曹諸掾曰不肯強諫  
反雨立閭巷或曰主簿語商恨以他職事去主

簿終身廢錮

望塵不及

後漢趙咨字文楚東郡人靈帝時拜東海相之  
官道經滎陽令敦煌曹嵩咨之故孝廉也迎路  
候謁咨不爲留嵩送至亭次望塵不及謂主簿  
曰趙君名重今過界不見必爲天下笑即弃印  
綬追至東海謁咨畢辭歸家爲時所重如此

半面之雅

後漢書應奉字世叔年二十時嘗詣彭城相袁  
賀賀時出行閉門造車匠於內開扇出半面視

奉後數十年於路見車匠識而呼之

不喜造謁

後漢井丹字大春受業太學京師語曰性清高未嘗修刺候人。張敷曰臣性不耐造謁

不造二人

後漢許劭字子將嘗到潁川多長者之遊唯不候陳寔又陳蕃喪妻還葬劭獨不往或問之曰太丘道廣廣則難周仲舉性峻峻則少通故不造也

且留東閣

漢朱雲成帝時不復仕常在鄠田時出乘牛車從諸生所過皆敬事焉薛宣爲丞相雲往見之宣備賓主禮因留雲宿從容謂曰在田野亡事且留我東閣可以觀四方奇士雲曰小生乃欲相吏耶宣不敢復言

造門不見

後漢高彪嘗從馬融欲問大義融疾不見乃覆刺遺融書曰聞高風爲日久矣故不待介者造君子之門冀一見龍光叙腹心之願不圖辭之以疾昔者周公兄父文武九命作伯以居華夏

猶握沐吐食以接白屋之士天下歸德歷載邈矣今君不能相見宜哉融省書大慙遣人辭謝追請徑去不還

不行報謝

張禹傳公卿相造請禹終不行報謝

詣荀郎陵

陳太丘詣荀郎陵貧儉無僕役乃使元方將車季方持杖從後長文尚小載著車中既至荀使叔慈應門慈明行酒餘六龍下食

世說

未嘗候謁

井丹字大春博學故京師為之語曰五經紛綸井大春未嘗書刺候謁人梁松請友丹不肯見後遂隱遁

昔負一刺

孟宗為豫章太守謂倉掾曰君昔負太守一刺寧識之否掾曰何困苦之戚哉

宓傳

不見弟

吳虞翻年十三客有候其兄者不過翻翻與書曰琥珀不取腐芥磁石不受曲鍼過而不存不亦宜乎客竒之

題門作鳳

嵇康與呂安善每一相思千里命駕後來值康不在嵇喜出戶延之不入題門上作鳳而去喜不覺猶以為欣作鳳字凡鳥也

為忍俄頃

桓温謀不軌郗超為之謀主謝安嘗與王文度共詣郗超日盱未得前文度便欲去安曰不能為性命忍俄頃耶其權重當時如此

超傳

主鞭門幹

桓玄嘗詣王忱通人未出乘輦直進忱對立便

鞭門幹玄怒去之忱亦不留

忱傳

前倨後恭

謝遏夏月嘗仰卧謝公清晨卒來不暇衣跣出屋外方躡履問訊公曰汝可謂前倨而後恭

賓不識主

劉綜欲候司馬徽先使左右問其存亡徽勸園左右問馬君所徽曰我是徽頭面醜陋聞者罵之曰即欲求司馬公何等田奴而稱徽更刷頭飾服而出左右叩頭謝之

別傳

問遠來意

晉范汪字玄平初為桓温安西長史温征蜀還復署為長史江州刺史皆不就自請還朝求為東陽太守温甚恨之後為安北將軍温北伐汪以失期免為庶人汪屏居吳郡後至姑孰見温時方起屈滯以傾朝廷謂汪詣已傾身引望曰范公來可作太常邪汪至温謝其遠來意汪實來造温恐以趨時致損乃曰亡兒座故來視之温殊失望而止

記爵里刺

魏夏侯淵七歲能屬文誦書日千言文帝聞而詣焉賓客百餘人人奏一刺書其鄉里姓名世所謂爵里刺也客示之一寓目使之遍談不謬一人帝深奇之

醉不能見

魏常林傳注時苗字德胄為壽春令蔣濟為治中苗初至謁濟濟素嗜酒適會其醉不能見苗恚恨刻木為人書曰酒徒蔣濟置之墻下旦夕射之

倒屣出迎

魏王粲蔡邕見而奇之邕嘗賓客盈坐聞粲在

門倒屣迎之粲至年既幼弱容短小一坐盡驚  
候見不盼

宋關康之隱居南平昌顏延之等候見散髮被  
黃布帕席松葉枕白石一塊而卧了不相盼延  
之等咨嗟而退不敢干也

入謁非是

齊張融欲詣吏部尚書何戢誤通尚書劉澄下  
車入門乃曰非是至戶望澄又曰非是既造及  
視澄曰都自非是乃去

取利勿通

北齊李元忠初神武東出元忠乘露車載素箒  
濁酒奉迎神武聞其酒客未即見之元忠下車  
獨酌擘脯食之謂門者曰本言公招延賢雋今  
國士到門不能吐哺輟洗其人可知還吾刺勿  
復通門者以告神武遽見之引入觴再行元忠  
上車取箒鼓之長歌慷慨謂神武曰天下形勢  
可見明公猶欲事爾宋乎神武曰富貴皆由他  
安敢不盡節元忠曰非英雄也因進從橫之策  
深見嘉納

雞跖集

終日奔謁

何思澄天監間敕徐勉舉學士入華林撰遍略  
勉舉思澄顧協劉杳王子雲鍾嶼等五人以應  
選思澄重交結分書與諸賓朋校定而終日造  
謁每宿昔作名刺一束曉便命駕朝賢無不悉  
與狎處即命食有人方之樓護欣然當之投晚  
還家所齎名刺必盡南史

不詣京尹

唐韋貫之為長安丞或薦之京兆尹李實實舉  
笏示所記曰此其姓名也與我同里素聞其賢  
願識之而進於上或告曰子今日詣實明日賀  
者至矣貫之唯唯不往

不與俗交

甫里先生陸龜蒙性不喜與俗人交雖詣門不  
得見也不置車馬不務慶弔內外姻黨伏臘喪  
祭未嘗及時往或寒暑得中體佳無事時則乘  
小舟設蓬席費一束書茶竈筆床釣具櫂船郎  
而已所詣小不會意徑還不留雖水禽決去山  
鹿駭走之不若自作傳

不見刺史

唐王績字無功絳州人刺史崔喜請相見荅曰

柰何坐致嚴君平邪卒不詣杜之松故人也爲  
刺史請績講禮荅曰吾不能揖讓邦君門談糟  
粕弃醇醪也

善士謁見

王適聞李將軍喜士乃踵門曰天下善士王適  
願見將軍白事

韓墓誌

遺縑門者

唐潘炎爲翰林學士時京兆尹有故候炎累日  
不得見乃遺閤者三百縑炎妻劉知之曰豈有  
京尹願一見遺以三百縑其危可去也乃勸炎

避位

請見不語

高士廉備禮請見朱桃椎與之語不答瞪目而  
去士廉再拜曰祭酒其使我以無事治蜀耶乃  
簡條目州遂大治

迎謁快快

唐令狐峘爲吉州刺史時齊映觀察江西按部  
及州峘輕映後出至迎謁頗快快語其妻妻曰  
君自視何如人以白頭走小生前君雖不以此  
黜死我憾快至峘入謁從容步進不持首屬戎



器映以爲恨擿峒事貶衢州司馬

溺於客次

五代唐趙鳳與于嶠俱在翰林相善鳳後爲相嶠以才名出鳳上而不用數非斥時政尤訛鳳鳳銜之因事左遷嶠秘書少監嶠因醉酒往見鳳鳳知其必不遜辭以沐髮嶠詬直吏又溺於從者直廬而去吏白嶠溺於客次且詬鳳鳳以聞明宗奪嶠官長流

見客問事

李昉爲相每見客必問三事民間有何疾苦爲

政有何術業時政有何闕失 李宗諤

謁見遭沮

文潞公判北京有汪輔之者新除運判爲人辨急初入謁潞公方坐廳事閱謁刺置案上不問入宅久之乃出輔之已不堪既見公禮之甚簡謂曰家人須令沐髮忘見運判勿訝輔之沮甚舊例監司至之三日府必作會公故罷之輔之移文定日檢按府庫通判以次白公公不答是日内外事並不許通輔之坐都廳吏白侍中家宴匙鑰不可請輔之怒破架閣庫鎖亦無從檢

按也密劾潞公不治 神宗批輔之所上奏付  
潞公有云侍中舊德故頓卧護北門細事不必  
勞心輔之小臣敢爾無禮將別有處置之語潞  
公得之不言一日會監司曰老謬無治狀幸諸  
君寬之監司皆愧謝因出御批以示輔之輔之  
皇恐逃歸託按部以出未幾輔之罷聞見錄

兩及吾門

諫議大夫張師德謁向文簡敏中曰師德兩詣  
王相公門皆不得見恐爲人輕毀望公從容明  
之一日方議知制誥公曰可惜張師德向公曰

何謂公累於 上前說張師德名家子有士行  
不意兩及吾門狀元及第榮進素定但當靜以  
待之耳若奔競使無階而進者當何如也向公  
方以師德之意啓之公曰某處安得有人敢輕  
毀人但師德後進待我淺也向公自稱師德適  
有闕望公弗遺公曰第緩之使師德知聊以戒  
貪進警薄俗也名臣遺事

鄙其請謁

王沂公當軸尤抑奔競張師德久次館閣魯簡  
肅公盛稱張才德沂公以未識爲解魯屢諷張

見沂公始緣職事一往沂公辭不見張大悔恨  
他日中書復議知制誥魯曰無以易張矣沂公  
曰張公器識德行足以當此但尚有請謁耳逾  
年方命掌誥滄水燕談

野服見客

見致仕門

禮有隆殺

元豐間文潞公以太尉留守西京未交印先就  
第廟坐見監司府官唐介參政之子義問爲轉  
運判官退謂其客尹煥曰先公爲臺官嘗言潞  
公今豈挾以爲恨耶某當避之煥曰潞公所爲  
必有理姑聽之明日公交府事以次見監司府  
官如常儀或以問公公曰吾未視府事三公見  
庶僚也旣交印河南知府見監司矣義問聞之  
復謂煥曰微君殆有失於潞公也

布衣抗禮

宰相自唐以來謂之禮絕百寮見者無長幼皆  
拜宰相平立少垂手扶之送客未嘗下階客坐  
稍久則更從旁喝相公尊重客踧踏起退及富  
鄭爲相雖微言布衣謁見皆與之抗禮送之及  
門視其上馬乃還自是羣公稍效之紀聞

遊謁有遇

范文正在睢陽掌學有孫秀才者索遊上謁文正贈錢一千明年孫生復謁文正又贈一千因問何爲汲汲於道路孫生戚然動色曰母老無以養若日得百錢則甘旨足矣文正曰吾觀子辭色非乞客也吾今補子爲學職月可得三千以供養子能安於學乎孫生大喜於是授以春秋後十年有孫明復先生以春秋教授學者道德高邁朝廷召至乃昔日索遊孫秀才也

東軒

相見不言

東坡在黃州邀一隱士相見但視傳舍不言而去坡曰豈非以身世爲傳舍耶

飲酣不見

蔡文忠公齊大中祥符登進士第爲狀元山東人賈同名士也與公同州部累往謁公值公飲酣不得見賈乃留詩一絕云聖君寵厚龍頭選慈母恩深鶴髮隨君寵母恩俱未報酒如爲患悔何追公因此戒飲

坐春風立寒雪

侯師聖云朱公掞見明道于汝歸讀人曰光庭

在春風中坐了一箇月游揚初見伊川瞑目而坐二子侍立既覺顧謂曰賢輩尚在此于日既晚且休矣及出門門外之雪深一尺

近思錄

一團和氣

謝顯道云明道先生坐如泥塑人及至接人則渾是一團和氣

見客端重

劉忠定公見賓客談論踰時體無歇側肩背竦直身不少動至手足亦不移

坐不交談

劉元城與人相見終坐不肯交談欲起屢留之然終不交談或問之曰人坐久必傾仄久而不傾仄必貴人也

朱語錄

拜跪有禮

王貽孫字象賢溥之子 太祖嘗問趙普拜禮何以男子跪婦人不跪徧問禮官無有知者貽孫曰古詩云長跪問故夫即婦人亦跪也唐天后朝始拜而不跪普問其所出對曰大和中幽州從事張建章渤海國記以溥藏書萬卷貽孫遍覽之

類苑

門題午字

李安義者謁富人鄭生辭以出安義於門上大書午字而去或問其故答曰牛不出頭耳此亦昔人題鳳之意遯齋閑

因徐辟見以下係先容

墨者夷之因徐辟而求見孟子

因景監見

衛鞅因景監求見孝公周顯王紀

請為紹介

平原君謂魯仲連曰勝請為紹介注相佑助也

史記

因介而見

郭林宗始入京師時人莫識符融一見歎服因以介於李膺由是知名

無先容

唐張行成曰古今用人必因媒介若行成者無

先容也本傳

沐髮不見以下係簡傲

王導子恬性傲誕不拘禮法謝萬嘗造恬既坐少頃恬便入內萬以為必厚待已殊有喜色恬

久之乃沐頭被髮而出據胡床於庭中曬髮神氣傲邁竟無賓主之禮萬悵然而還

自恃其貴

後魏任城王澄子順爲給事中時尚書令高肇帝舅權重天下順曾懷刺詣肇門門者以其年少答云在坐大有賓客不肯爲通順叱之曰任城王兒可是賤也及見直往登牀捧手抗禮王公先達莫不恠懼而順辭吐傲然若無所覩謂衆曰此兒豪氣尚爾况其父乎澄聞之大怒杖順數十

古今文集

雜著

門不停賓

昔者周公一沐三握髮一飯三吐餐以接白屋之士一日所見七十餘人晉文公以沐辭豎頭須致有圖反之誚門不停賓古所貴也失教之家閤寺無禮或以主君寢食嗔怒拒客未通江南深以爲恥黃門侍郎裴之禮好待賓客或有此輩對賓杖之僮僕引接折旋俯仰莫不肅敬與主無別

顏氏家訓

上節度使書

房魯

文粹

今之君侯垂金印結紫綬處內則堂奧數仞侍  
婢娟然衣羅紈鳴珥環出聲態者累百居外則  
戟列重扉介夫毅然執弩矢擁鈇鉞俟指令者  
數千君侯目視飛鴻氣如蟻蚘而貢士布衣有  
塵飢童無色寒驢竭麾而來干謁誠志業不怍  
氣容自若且以干望爲心亦不能無愧其望非  
望飲醲齧肥被鮮曳華指捷乘駿也所以望者  
蓋砥行立名之流非附青雲之士焉得施於世  
其愧非愧布衣糲食飢童寒驢也所以愧者彼  
何人也予何人也

溫公客位榜

司馬溫公作相日親書榜揭于客位曰訪及諸  
君若覩朝政闕遺庶民疾苦欲進忠言者請以  
奏牘聞於朝廷光得與同僚商議擇可行者進  
呈取旨行之若但以私書寵喻終無所益若光  
身有過失欲賜規正即以通封書簡分付吏人  
令傳入光得內自省訟佩服改行至於整會官  
職差遣理雪罪名凡干身計並請一面進狀光  
得與朝省衆官公議施行若在私第垂訪不請



語及某再拜咨白 容齋隨筆

朱文公客位榜 見致仕門

冠帶出謁

符舜功曰去歲初得官欲冠帶參先生以顯道  
言而止今思之亦是失禮文公曰畢竟是君命  
良久笑曰顯道亦出世間法某幼聞劉諫議初  
仕時嘗冠帶乘涼轎還人事後又聞李先生云  
楊龜山初得官時亦冠帶乘轎還人事往往前  
輩皆如此今人都不理會其間有如此者遂西  
之要之冠帶為禮 朱語錄

與湖北陳提舉

楊廷秀

僕與執事出處不齊如相避然寸心歆然至今  
遺恨今乃欲以尺紙之敬捺中情之勤以納交  
於英蕩之末光前無契好後無介紹或者以為  
驟一則野人一則顯仕或者以為僭焉抑聞孔  
文舉與李元禮初無一日雅而文舉遠引仲尼  
作陽之交以為世契元禮然之吾家德祖與公  
家孔璋同為子建之賓客非世契乎豈曰驟之  
云乎張文潛與公家後山初不相識而以一書  
空交所謂朝陽之光在袖久矣者其書云耳則

僕之尺書豈曰借之云乎太史公曰可為智者  
道難與俗人言也

古詩

贈張徐州謾

范彥能

田家採樵去薄暮方來歸還聞稚子說有客歎  
柴扉儂從皆珠玳裘馬悉輕肥軒蓋照墟落傳  
瑞生光輝疑是徐方牧既是復疑非思舊昔言  
有此道今已微物情弃疵賤何獨顧衡闈恨不  
具雞黍得與故人揮懷情徒草草淚下空霏霏  
寄書雲間鴈為我西北飛

嘲熱客

程曉

平生三伏時道里無行車閉門避暑卧出入不  
相過只今襪襪子觸熱到人家主人聞客來頻  
蹙柰此何搖扇臂中疼流汗正滂沱傳戒諸高  
明熱行宜見呵

歐陽永叔王原叔二翰林韓子華吳  
長文二舍人同過弊廬值出不及見

十二月七日

司馬君實

枯竹為門扉不可容車騎况如鄭廣文無氈藉  
賓位窮冬月破七貴客聯玉轡傳騶肅里問下

塌呼童稚問我何所往共留墻上字兒愚不知  
誰金章言照地既居卿大夫恨莫親帚箕星躔  
回已高麟距寧復致戢戢鄰巷居相見竊自喟  
豈料瘦老翁能令賢達至昔時蓬蒿徑安有此  
盛事

袖刺

劉彥冲

袖刺謁諸鄰徘徊寄心賞潭潭廣厦深咳唾生  
餘響茲邦懷地寶比屋誇雄敞何如蓬廬士貧  
賤安所養

高軒過

華裾織翠青如葱金環壓轡搖玲瓏馬蹄隱耳  
聲隆隆入門下馬氣如虹云是東京才子文章  
鉅公二十八宿羅心胷元精耿耿貫當中殿前  
作賦聲摩空筆補造化天無功龐眉書客感秋  
蓬誰知死草生華風我今垂翅附冥鴻它日不  
羞蛇作龍

撫言云字賀年七歲以長短之製名動京  
華時韓文公與皇甫覽賀所作竒之因連  
騎造門求見賀總角荷衣而出二公不之  
信因令面賦一篇賀承命欣然操觚染翰

傍若無人仍名高軒過二公大驚

尋山家

羊士諤

獨訪山家歇還涉茅屋斜連隔松葉主人間語  
未開門繞籬野菜飛黃蝶

尋隱者不遇

魏野

尋真誤入蓬萊島香風不動松花老採芝何處  
未歸來白雲滿地無人掃

謁客

張文潛

入門投謁吏翩翩我非欲見禮則然異哉賓主  
兩無語客起疾走如避然我已不恭愧昔賢忍

使塗炭朝衣冠人生暫聚鴻集川春風吹飛何  
後先

律詩

鄭果州相過

王維

斜日照殘春初晴草木新牀前磨鏡客樹下灌  
園人五馬驚窮巷雙童逐老身中厨辦粗飯當  
恐阮郎貧

喜孫狀元訪

魏野

道同忘貴賤陋巷每來看相見唯呼字留題不  
着官狂吟無所忌靜話有餘懽却恨歸公署茅

堂會宿難

謁華州李相不遇 唐平魯

老夫三日門前立珠箔銀屏晝不開詩卷却拋  
書袋裏匹如閑看華山來

訪李廓不遇 韋應物

九日驅馳一日閑尋君不見又空還恠來詩思  
清人骨門對寒流雪滿山

謝寇相公相訪 魏野

晝睡方濃向竹齋柴門日午尚慵開驚回一覺  
遊仙夢村巷傳呼宰相來

中書兩入寇尚書出鎮雄藩半載餘棠樹陰中  
無訟聽閑騎白馬到茅廬

閤吏 司馬君實

弊車羸馬犯塵泥愁到朱門徧徧辭相國舍人  
雖驟見將軍馬監豈相知因循歲月勞何補顛  
倒風埃辱固宜惆悵東岡舊坡在素心空負白  
雲期

詩話

東閣不見

李商隱為彭陽公令狐楚從事彭陽之子絢繼

有韋平之拜惡商隱從鄭亞之辟以爲忘家恩  
踈之重陽日謁令狐絢不見商隱留詩於其廳  
事曰曾共山公把酒卮霜天白菊正離披十年  
泉下無消息九日樽前有所思不學漢臣栽首  
宿空教楚客詠江籬郎君官貴施行馬東閣無  
因再得窺絢見之乃補太學博士尋爲東川柳  
仲郢判官罷歸客滎陽卒 唐詩紀事

獻其父詩

李吉甫之父微時以一絕投維陽都護宋甄大  
夫宋殊無意李後生吉甫吉甫節判青州有舉  
子吳武陵詣府投獻並不禮之武陵遂書前語  
以獻吉甫厚賂之請爲寢默詩曰十處投人九  
處違家鄉萬里又空歸嚴霜昨夜催人骨誰念  
高堂未授衣 監戒錄

典謁所阻

劉魯風投謁所知爲典謁者阻因賦詩云萬卷  
書生劉魯風煙波萬里謁文翁無錢乞與韓知  
客名紙毛生不爲通 撫言

題屏寓嘲

江南處士朱貞白善嘲詠嘗謁一貴人不禮廳

事有格子屏風貞白題詩云道格何曾格言糊  
又不糊渾身都是眼還解識人無談苑

託寢不見

韓魏公知中山李清臣謁見其姪吏報曰太祝  
方寢清臣因題詩于壁云公子乘閑卧絳厨白  
衣老吏慢寒儒不知夢見周公不曾說當年吐  
哺無魏公見之曰吾知此人久矣竟有東牀之

選青瑣高議

懶謁朱門

李觀初爲太學官因上言役法不便出通判處  
州題詩曰十謁朱門九不開利名淵藪且徘徊  
自知不是公侯骨夜夜江山入夢來

小嫌不見

陳希亮字公弼剛正人也嘉祐中知鳳翔府東  
坡初擢制科簽書判官事吏呼蘇賢良公怒曰  
府判官何賢良也杖其吏不顧或謁入不得見  
故東坡客次假寢詩云謁入不得去兀坐如枯  
株豈惟主忘客今我亦忘吾同僚不解事愠色  
見髯鬚雖無性命憂且復忍斯須後九日不預  
府宴登真興閣詩云憶弟恨如雲不散歸鄉心

皇朝類集卷二十七

三

似雨難開其不堪如此

新編古今事文類聚卷之二十七

別集

新編古今事文類聚卷之二十八

別集

建安祝穆和父編

人事部

知人 昧於知人 知已 不見知

羣書要語

子曰不患人之不知患不知人 也為政人固未易知知人亦未易

范睢傳聽之於未聞察之於未形而鑒其神智 識其才能可謂知人若功成事遂然後知之者 何異耳聞雷霆而稱為聰目見日月而謂之明



乎劉子知已孔子曰知我者其惟春秋乎罪我

者其惟春秋乎孟子不見知子曰莫我知也夫

不怨天不尤人下學而上達知我者其天乎十

四知我者希則為貴矣老子

詩句期君蟠桃枝千歲終一嘗山谷知已馬因

回首雖增價桐遇知音已半焦白集

**古今事實**

知人為難

皋陶曰都在知人在安民禹曰吁咸若時惟帝其難之

舉直錯枉

樊遲問知子曰知人樊遲未達子曰舉直錯諸枉能使枉者直

知賢不進

臧文仲魯大夫臧孫辰也時柳下惠為士師文仲知其賢而不進達之孔子曰臧文仲其竊位者歟知柳下惠之賢而不與立也

聞絃賞音

賈公使蔣幹說周瑜先覺之謂幹曰吾雖不及夔曠聞絃賞音足知雅曲也

知其必貴

何充嘗詣王道導以塵尾指床呼充共坐曰此是君座也及導薨充參錄尚書事○王珣與謝玄為桓溫掾溫嘗謂之曰謝掾年四十必擁旌杖節王掾嘗作黑頭公並本傳

誤天下蒼生

王衍嘗造山濤濤嗟歎良久既去目而送之曰何物老嫗生寧馨兒然誤天下蒼生者未必非此人也

號為冰鑑

司馬徽清雅有知人之鑒龐德公嘗謂德操為冰鑑

能知房杜

吏部侍郎高孝基稱知人見房喬曰當為偉器恨不見其聳壑昂霄見杜如晦曰公有應變之才當為棟梁之用

知其必叛

張九齡曰祿山失律喪師於法不可不誅且臣觀其貌有反相不殺必為後患上曰卿勿似王夷甫識石勒枉害忠良竟赦之本傳

知其內險

郭子儀病甚百官造省不屏姬侍及盧杞至則屏之隱几而待家人恠問其故曰彼外陋內險左右見必笑使後得權吾族無類

爲道出處

蘇子容丞相始爲南都從事時杜正獻公方致仕居南都見蘇公大器之爲道其平生出處本末甚詳曰子異時所至亦如老夫願勉旃自愛蘇公唯唯謝之

徐度却掃

知入玉堂

熙寧間蘇公頌以集賢院學士守杭州梁况之以朝官通判明州之官道出錢塘公一見異之留連數月待遇甚厚旣別復遣介至津亭手簡問勞且以一硯遺之曰石硯一枚留爲異日玉堂之用梁公姑謝而留之元祐六年梁公在翰苑一夕宣召甚急將行而常所用硯誤墜地碎倉卒取他硯以行旣至則面受旨尚書左丞蘇某拜右僕射梁公受命退歸玉堂方抒思命詞涉筆之際視所携硯則頃年錢塘蘇公所贈也因恍然大驚是夕梁公亦有左丞之命他日會

政事堂語及之蘇公一笑而已却掃編

心服二人

溫公退居洛陽每論當世人物必曰呂獻可之先見范景仁之勇決皆予所不及心誠服之劉

諫議集

寇丁相軋

寇萊公與丁晉公始甚相善李文靖公為相丁公尚為兩制萊公屢以丁薦而公不用何也文靖答曰今已為兩禁矣稍進則當國如斯人者果可當國乎寇曰如丁之才相公自度終能抑

之否文靖曰唯行且用之然他日勿悔也既而二公秉政果傾軋竟如文靖之言倦遊雜錄

知其秉鈞

王沂公知制誥一日至中書見王文正公問君識一呂夷簡否沂公曰不識也退而訪諸人呂公方為太常博士倅濱州文正曰此人異日與舍人對秉鈞軸沂公曰何以知之曰吾亦不識但以其奏請得之如不稅農器之類沂公姑應之及丁晉公敗沂公引為執政卒與沂公並相沂公從容道文正語皆嗟歎以為非所及龍川志

知王荆公

韓魏公嘗云吳長文奎有識方天下盛推王安

石以為必可致太平唯長文獨語曰王安石心

強性狠不可大用魏公別錄呂獻可任御史中

丞將對崇政殿司馬溫公密問曰今日欲言何

事獻可曰袖中彈文乃新參也溫公愕然獻可

正色曰王安石雖有時名上意所向然好執偏

見不通物情輕信難回喜人佞已聽其言則美

施於用則踈若在侍從猶可容置諸宰府則天

下受其弊劉諫議集王安石始為政司馬溫公

上踈逆陳其利害曰後當如是及二十餘年無

一不如公言行狀神宗將召用介甫訪於大

臣爭稱舉之張安道時為承旨獨言安石言偽

而辯行偽而堅用之必亂天下記聞

不以貌取

子路曰澹臺子羽有君子之容而行不勝其貌

宰我有文雅之辭而智不充其辯相馬以車相

士以居以容取人則失之子羽以言取人則失

之宰予家語

不能擇人

叔孫穆子好善而不能擇人 襄二十九

知我者鮑叔 以下係知己

列子曰管夷吾與叔牙二人相友管仲曰吾與鮑叔賈分財多自與鮑叔不以我為貪知吾有親也吾嘗為鮑叔謀事大窮困鮑叔不以我為愚知時有不利也吾嘗三仕三見逐鮑叔不以我為不肖知不遭時也知我者鮑叔生我者父母昔鮑叔有疾管仲為之不食不內漿甯戚患之管仲曰生我者父母知我者鮑叔士為知己者用馬為知己者良鮑叔死天下莫知安用水

漿雖為之死亦何傷哉 韓詩外傳

伸於知己

晏嬰之晉至中牟見弊冠反裘負芻息於道側者嬰問曰吾子何為者對曰我越石父者為人臣僕於中牟見使將歸嬰曰何為僕對曰吾身不免凍餓之地吾是以為僕也嬰曰可得而贖乎對曰可遂解左驂而贖之因載而與之俱歸至舍不辭而入越石父立而請絕晏嬰使人應之曰子何絕我之暴也越石父曰臣聞士者屈於不知己而伸於知己吾三年為臣僕人莫吾

知也今子贖我吾以為知己矣今不辭而入是與臣我者同矣晏子出見之曰向也見客之容今也見客之意遂以為上客

哭無知己

子產聞子皮卒哭且曰吾已無與為喜矣惟夫子知我

左昭十三

惜無知己

莊子送葬過惠子之墓謂從者曰郢人堊其鼻端若蠅翼使匠石斲之匠石運斤成風斲之盡堊而鼻不傷郢人立不失容宋元君聞之召匠石曰嘗試為寡人為之匠石曰臣則能斲之雖然臣質死久矣自夫子之死也吾無以為質矣吾無與言也

莊子

破琴絕絃

伯牙鼓琴意在泰山鍾子期曰善哉巍巍若泰山俄而志在流水子期曰善哉湯湯乎若流波子期死伯牙破琴絕絃終身不復鼓琴以為世無賞音者

說苑

伯樂一顧

蘇代為燕說齊先說淳于髡曰人有賣駿馬者

一旦立市人莫知往見伯樂而顧之馬價十倍  
今臣欲以駿馬見於王莫爲臣先後者足下有  
意爲伯樂乎髡入言之齊王大悅蘇子戰國策  
行見其異

茅容與等輩避雨樹下衆皆夷踞相對容獨危  
坐愈恭郭林宗見而奇其異遂與共言

感知不忘

羊曇爲謝安所知安薨後撤樂彌年行不由西  
州路

幾至不遇

習鑿齒有才桓宣武器之未三十用爲荊州治  
中謝朓曰不遇明公荊州老從事耳世說

莫知斯已以下係不見知

子擊磬於衛有荷蕢而過孔氏之門者曰莫已  
知也斯已而已矣深則厲淺則揭

束之高閣

殷浩才名冠世庾翼弗之重也每語人曰此輩  
宜束之高閣俟天下太平然後議其任耳庾傳

獻玉遭刖

應劭曰卞和得玉璞獻之武王武王示玉人玉



人曰石則其右足武王沒復獻文王玉人復曰  
石也則其左足至成王時卞和抱璞哭於郊乃  
使玉尹攻之果得寶玉史記

遺絹不受

牛僧孺詣襄陽于頔求知頔以海客遇之牛怒  
而去後召客牛秀才發未曰已去立命小將賫  
書絹五百疋追之僧孺不啓封揖回幽閑鼓吹

自惜不遇

吉温常曰若遇知已南山白額虎不難縛也唐元紀

魏公不見知又見詩話

韓魏公知揚州王介甫以新進士僉書判官事  
魏公雖重其文學而不以吏事許之介甫數引  
古義爭公事其言迂闊魏公多不從介甫秩滿  
去會有上韓公書者多用古字韓公笑而謂僚  
屬曰惜王介甫不在此其人頗識難字介甫聞  
以爲韓公輕已由是怨之記聞

古今文集

雜著

送丘儒赴舉序

皇甫湜

吾居河陰丘生敲門請曰儒貴求知余謹自露  
願以是非賜決語其學如猗頓之富聽其音如  
清廟之樂觀其刻意勵行如奉商鞅之法而懼  
秦刑吾驚而與之遊踰年將闔其藝於洛下吾  
遠來洛下喻之曰子知市乎懷貝玉以之名都  
之肆未有不售者也挈而之三家之墅未有不  
爲盜困幸矣子將安寘哉京師賢才市也一人  
不知子也他人知子一門不容子也他門容子  
子謹持其所有以往未有不成就也今子之類  
固少勢能移事者稀爲一不知爲一相移白變  
而復黑倒上而爲下吾未如之何矣生不信而  
試果困而見吾酌酒而賀之曰謹持貝玉以往  
之都市可矣曰諾乃叙其行

答陳商書

韓愈

辱惠書語高而旨深三四讀尚不能通曉茫然  
增愧赧又不以其淺弊無過人智識且喻以所  
守幸甚敢不吐情實然自識其不足補吾子所  
須也齊王好竽有求仕於齊者操瑟而往立王  
之門三年不得入叱曰吾瑟鼓之能使鬼神上  
下吾鼓瑟合軒轅氏之律呂客罵之曰王好竽

而子鼓瑟瑟雖工如王不好何是所謂工於瑟而不工於求齊也今舉進士於此世也求祿利行道於此世而爲文必使一世人不好得無與操瑟立齊門者比歟文誠工不利於求求不得則怒且怨不知君子必爾爲不也故區區之心每有來訪者皆有意於不肖者也略不辭讓遂盡言惟吾子諒察

與馮宿論文書

韓愈

昔揚子雲著太玄人皆笑之子雲之言曰世不我知無害也後世復有揚子雲必好之矣子雲死近千載竟未有揚子雲可歎也其時桓譚亦以雄書勝老子老子未足道也子雲豈止與老子爭強而已乎此誠未必爲知雄者其弟子侯芭頗知之以爲其師之書勝周易然侯芭之他文不見於世不知其人果如何耳以此而言作者不祈人之知也明矣直百世以俟聖人而不惑質諸鬼神而不疑耳足下豈不謂然乎

古詩

詠貧士

陶淵明

仲蔚愛窮居遠舍生蒿蓬翳然絕交遊賦詩頗

能工舉世無知者止有一劉龔此士胡獨然寔由罕所同介然安其業所樂非窮通人事固已拙聊得長相從

詩話

魏公不見知

韓魏公知揚州王荆公爲僉判每讀書達旦略假寐日已高亟上府多不及盥嗽魏公見荆公年少意其夜飲放逸一日從容謂荆公曰君年少毋廢書不可自棄荆公不答退而言曰魏公非知我者魏公後知荆公之賢欲收之門下荆

公終不屈如召館職不就之類是也故荆公熙寧日錄中短魏公爲多每曰韓形相好耳作畫虎圖詩詆之及魏公薨荆公有挽詩云幕府少年今白髮傷心無路送靈輶猶不忘魏公少年之語也又入瓜步望揚州詩云白頭追想當年事幕府青衫最少年

揚善

隱惡 附

羣書要語

宗族稱孝焉鄉黨稱弟焉語或輓之或推之欲無人得乎裏十四借

譽左右

鄒陽傳

諸公譽之不容口

晁錯傳

相與

提衡言相提携也

杜周傳

玉潤金聲蘭薰桂馥

駱賓王傳

鳳凰芝草賢愚皆以為美瑞青天白日

奴隸皆知其清明

韓文

今子之來無所挾吾

猶將張之况文與行不失其世守惜夫吾力不

能振之而其言不見信於世也

韓愈送王含序

**隱惡**

君子隱惡而揚善 中庸 攻其惡毋攻人之

**惡**

語

**詩句**

名聲荷朋友

韓

青真送吹噓

韓薦士詩

**隱惡**

順物無瑕疵

山谷

古今事實

曹丘掄揚

見書問門

稱述多過

龐士元性好人倫勤於長養每所稱述多過其  
才時人恠而問之統答曰當今天下大亂雅道  
陵夷善人少而惡人多方欲興風俗長道業不  
美其譚則聲名不足企慕而為善者少矣今拔  
十失伍猶得其半而可以崇邁世教使有志者  
自厲不亦可乎

無惜齒牙

謝眺好獎人才會稽孔閏粗有才筆未為時所知孔珪嘗令草讓表以示眺眺嗟吟良久手自折簡寫之謂珪曰此子聲名未立應共獎成無惜齒牙餘論本傳

吃吃不離口

韓愈答揚子書曰東野吃吃說足下不離口故不待相見相信已熟既相見不要約已相親

恥言人過

以下係隱惡

漢文帝躬修元默將相皆舊功臣少文多質論議務在寬厚恥言人之過失化行天下告訐之

俗易風流篤厚刑志

掩匿人過

曹參見人有過掩匿覆蓋之

本傳

不責小文

陳遵入公府日出醉歸曹事數廢西曹請斥之大司徒馬宮重遵謂西曹此人大度士柰何以小文責之

盜衣不言

宋褚彥回有門生盜其衣彥回遇見謂曰可密藏之勿使人見門生慙而去

事類彙編卷三

古

能蔽風露

齊王僧祐父遠時人為之語曰王遠如屏風屈曲能蔽風雨

書惡必封

韓魏公為相見文字有攻人隱惡者必手封之人未嘗見別錄

古今文集

古詩

贈秦少儀

黃魯直

秦少儀好為詩初不甚工既而以

所業見山谷山谷贈以詩當時多以

為許予之過然少儀緣此詩思大發

汝南許文休

靖

馬磨自衣食但聞郡功曹滿世

名籍籍渠命有顯晦非人作通塞秦氏多英俊

少遊眉最白頗聞鴻鴈行筆皆萬人敵吾早知

有觀而未知有覲少儀袖詩來剖蚌珠的礫乃

能持一鏃與我箭鋒直自吾得此詩三日卧向

壁挽來不能寸推去忽數尺才難不其然有亦

未易識

律詩

古今文集卷之三

三

古今文集卷之三

三

贈項斯

楊敬之

幾度見君詩摠好及觀標格過於詩平生不解  
藏人善到處逢人說項斯  
雜著 以下係隱惡

不顯臣過

賈誼

古者大臣有坐不廉而廢者不謂不廉曰簞簞  
不節坐污穢淫亂男女無別者不曰污穢曰惟  
薄不脩坐罷軟不勝任者不謂罷軟曰下官不  
職故貴大臣定其有罪矣猶未斥然正以噉之  
也尚遷就而為之諱故其在大譴大何之域者

聞譴何則白冠纓纒盤水加劔造請室而請辜  
矣上不執縛係引而行也其有中罪者問命而  
自弛上不使人頸盤而加也其有大罪者聞命  
則北面再拜跪而自裁上不使捽抑而刑之也  
曰子大夫自有過耳吾遇子有禮矣

誠兄子書

見叔姪門

求茈

依茈同

羣書要語

萬與女蘿施于松柏頗弁周之東  
遷晉鄭焉依左隱六皮之不存毛



將焉傳左僖十四蒙鳩以羽為巢而編之以髮  
繫之以葦若風至若折卵破子死巢非不完也  
所繫者然也荀子震風凌雨而後知厦屋之為  
帡幪也揚子攀龍附鳳並乘天衢西漢序贊  
蚤終日經營不能越階序附驥尾則涉千里攀  
鴻翮則翔四海四子講德論以肺腑為相注如  
肺腑之相附着也田蚡傳盥汗交流喘息薄喉  
當此之時休越下則脫然而喜矣注楚人樹上  
大本小如車蓋狀為樾言多蔭也淮南城狐社  
鼠晉紀社鼯不灌屋鼠不熏何則所託者然也

中山王傳攫蜂不攻社鼠不熏其所託者然也  
韓信外傳

**詩句**兔絲附蓬麻杜願為雙飛燕銜泥巢君屋

古詩依水類浮萍寄松如懸蘿潘安仁但得有

錢留客醉誰能騎馬傍人門盧秉一榻偶依陳

太守羅隱近水樓臺先得月向陽花木易為春

薛麟詩安得廣厦千萬間大庇天下寒士俱歡

顏嗚呼何時眼前突兀見此屋吾廬獨破受凍

死亦足杜

古今事實

屬託邑子

前尹翁歸拜東海太守過辭廷尉于定國定國欲屬託邑子兩人終日不敢見曰此賢將汝不任事也又不可干以私

爲李將軍地

田蚡謂灌夫曰程李俱東西宮衛尉今衆辱程將軍仲孺獨不爲將軍地乎詳見飲酒門

我獨有二天

蘇章遷冀州刺史故人爲清河太守章行部案其姦賊乃請太守爲設酒肴陳平生之好甚歡

太守喜曰人皆有一天我獨有二天章曰今夕蘇孺文與故人飲者私恩也明日冀州刺史案事者公法也遂舉正其罪

古今文集

雜著

凌霄花賦

梅聖俞

厥草惟夭厥木惟喬草有柔蔓木有繁條緣根兮附帶有葉兮敷苗朱華燦兮上覆本榦蔽兮不昭嗟兮此木幾歲幾年而至於合抱夫何此草一旦一夕而遂曰凌霄是使藜藿蒿艾慕高

艷而仰翹翹也安知蘋藻自潔蕙蘭自芳芙蓉  
出污而自麗芝蘭不培而自長或紉佩帶或采  
頃筐或製裳於騷客或登歌於樂章故得爲馨  
爲薦爲嘉爲祥皆無附著亦以名揚奚必託危  
柯而後昌吾謂木危多枯風高必折當是時將  
恐摧爲朽芟不復萌蘖豈得與百卉並列也耶  
古詩

兔絲

元稹

人生莫依倚依倚事不成君看兔絲蔓依倚荆  
與榛荆榛易蒙密百鳥撩亂鳴下有狐兔兀奔  
走亦縱橫樵童斫將去柔蔓與之并翳薈生可  
恥束縛死無名桂樹月中出珊瑚石上生俊鶻  
渡海食應龍昇天行靈物本特達不復相纏縈  
纏縈竟何者荆榛與飛莖

律詩

題木居士

韓愈

火透波穿不計春根如頭面葉如身偶然題作  
木居士便有無窮求福人

求哀

求援

羣書要語

同恤災危備救凶患左救人於危振人不贍太史公自序上無許史

之屬下無金張之託鄭昌書無公輔一言之薦

無左右為容之助中流失船一壺千金鶡冠子

哀窮悼屈韓文蹈水火者之求免於人也不惟

其父兄子弟之慈愛然後往而全之也將有介

於其側者雖其所憎怨苟不至欲其死者則將

大聲疾呼而望其人之救也韓文朝無一命之

親路無回眸之舊韓文歐陽詹哀詞

詩句愧無鷓鴣姿短翮空飛遠誰當假羽毛雲

路相追攀韋應物遺簪墮履應留念門客如今

只下僚羅隱

古今事實

肉袒求哀

楚子圍鄭三月克之鄭伯肉袒牽羊以逆曰孤不天不能事君使君懷怒以及敝邑孤之罪也敢不唯命是聽其俘諸江南以實海濱亦唯命其翦以賜諸侯使臣妾之亦唯命若惠顧前好徼福於厲宣桓武不泯其社稷使改事君夷於九縣君之惠也孤之願也非所敢望也敢布腹

心君實圖之

左宣十二

涸鮒求水

莊周貧貸粟於監河侯監河侯曰諾我將得邑金將貸子三百金可乎莊周曰昨周來有中道而呼者周顧視車轍中有鮒魚焉周問之對曰我東海之波臣也君豈有升斗之水而活我哉周曰諾我且南遊吳越之王激西江之水而迎子可乎鮒魚曰吾得斗升之水然活耳君乃言此曾不如早索我於枯魚之肆

求渡得脫

伍子胥奔吳到昭關昭關欲執之子胥幾不得脫追者後至江上有一漁父乘船知子胥之急乃渡子胥

佯死求脫

魏齊笞擊范雎折脅摺齒雎佯死卷以簣置廁中使客醉者更溺之范雎謂守者曰能出我我必有厚謝守者乃請棄簣中死人魏齊醉曰可矣

周紀

匿布廣柳

見避禍門

藏趙復壁

見避禍門

舉幡救罪

鮑宣下廷尉王咸舉幡太學下曰欲救鮑司隸者會此諸生會者千餘人遮丞相孔光車不得行宣減死一等

門生求囑

晉王襄字偉元城陽人門生爲安丘縣所役求襄屬令襄曰卿學不足以庇身吾德薄不足以蔭卿且吾不執筆四十年矣乃步檐乾飯兒負鹽致草屨送所役生到縣門徒從者千餘人安丘令以爲詣已出迎之襄乃下道至土牛旁磬折云門生爲縣所役故來送別因執手涕泣而去令即放之一縣以爲羞

不知救已

王敦舉兵劉隗勸帝盡誅諸王司空導率羣從詣闕請罪值周顛將入導呼顛謂曰伯仁以百口累卿顛直入不顧既見帝言導忠誠申救甚至帝納其言顛出導猶在門又呼顛顛不與言顧左右曰今年殺諸賊奴取金印如斗大繫肘既出又上表明導言甚至導不知救已而甚街之及敦誅顛而導不言後料檢中書故事見顛

表救已流涕告諸子曰吾雖不殺伯仁伯仁由我而死幽冥之中負此良友

顛傳

託鬼求援 以下係求援

晉羅友家貧乞祿於桓溫溫雖以友才學過人以其放誕許而未用同府有得郡者溫爲坐叙別友亦被召至尤遲溫問友答曰中路見鬼擲揄云我只見汝送人上郡不見人送汝上郡友始怖終慙不覺掩淚溫後以爲襄城太守

古今文集

雜著

論求援與報仇

王子晉云佐饗得嘗佐鬪得傷此言爲善則預爲惡則去不欲黨人非義之事也凡損於物皆無與焉然而窮鳥入懷仁人所憫况死士歸我當棄之乎伍員之託漁舟季布之入廣柳孔融之藏張儉孫嵩之匿趙岐前代之所貴而吾之所行也以此得罪甘心瞑目至於郭解之代人報讎灌夫之橫怒求地游俠之徒非君子之所爲也如有逆亂之行得罪於君親者亦不足卹

焉親友之迫危難也家財已力當無所吝若橫  
生圖計無理請謁非吾教也墨翟之徒世謂熱  
腹楊朱之侶世謂冷腸腸不可冷腹不可熱當  
以仁義爲節文耳

顏氏家訓

與韋舍人書

韓愈

天地之濱大江之濱曰有恠物焉蓋非常鱗凡  
介之品彙匹儔也其得水變化風雨上下于天  
地不難也其不及水蓋尋常尺寸之間耳無高  
山大陵曠塗絕險爲之關隔也然其窮涸不能  
自致乎水爲獾獺之笑者蓋十八九矣如有力  
者哀其窮而運轉之蓋一舉手一投足之勞也  
然是物也負其異於衆也且曰爛死於沙泥吾  
寧樂之若俛首帖耳搖尾而乞憐者非我之志  
也以有力者遇之熟視之若無覩也其死其生  
固不可知也今又有有力者當其前矣聊試仰首  
一鳴號焉庸詎知有力者不哀其窮而忘一舉  
手一投足之勞而轉之清波乎其哀之命也其  
不衰之命也知其命而且鳴且號之者亦命  
也

上李夷簡相公書

柳宗元



某聞人有行三塗之難而墜千仞之下者仰望  
於道號以求出過之者日千百人皆去而不顧  
就令哀而顧之者不過攀木俯首深曠太息良  
久而去耳卒無可柰何然其人猶望而不止也  
俄而有若鳥獲者持長綆千尋徐而過焉其力  
足爲也其器足施也號之而不顧顧而曰不能  
力則其人知必死於大壑矣何也是時不可遇  
而幸遇焉又不逮乎已然後知命之窮勢之極  
其卒呼憤自斃不復望於上矣某曩者齒少心  
銳徑行高步不知道之艱以陷乎大阨窮躓殞  
墜廢爲孤囚日號而望者十四年矣其不顧而  
去與顧而深曠者俱不乏焉然猶仰首伸吭張  
目而視曰庶幾乎其有異俗之心非常之力當  
路而垂仁者耶伏今閤下念墜者之至窮錫烏  
獲之餘力舒千尋之綆垂千仞之艱致其不可  
遇之遇以卒成其幸庶號而望者得畢其誠無  
使呼憤自斃沒有餘恨則士之死於門下者宜  
無先焉生之通塞決在此舉

律詩

旱魚詞上苗相公

姚鵠  
英華

似龍鱗已足唯是欠登門日裏腮猶濕泥中目  
未昏乞鋤防蟻穴望水瀉金盆他日能為兩公  
田報此恩

律詩

下第後寄池州鄭負外


杜荀鶴

省得蓬蒿修謁初蒙知曾不見生疎侯門數處將  
書薦帝里經年借宅居未必有詩堪諷誦只憐無  
援過吹噓而今足得成持取莫使江湖却釣魚

新編古今事文類聚卷之二十八

別集

存  
561  
L



三

三

三

三

三

三